

東

華

錄

東華錄

康熙十七

臣王先謙敬編

臣周淪蕃恭校

康熙十五年丙辰春正月甲申朔理藩院員外郎拉篤祜奏十四
年十二月二十二日甯夏提標兵變提督陳福遇害 上諭甯夏
三邊要地所關綦重可令將軍侯張勇巡撫花善卽速會議如鞏
昌無虞分一人赴甯夏慰諭官軍其副都統恰塔所領兵及員外
郎拉篤祜所領土默特兵應駐防靈州定邊等處陳福被害之由
著總督哈占巡撫杭愛察實具奏諭兵部提督陳福已爲亂兵所
害秦省提督職任重大宜得賢能以資彈壓西甯總兵官王進寶
忠誠克殫勞績素著著授爲陝西提督暫駐秦州仍兼理西甯總
兵官事其甯夏總兵官員缺聽將軍侯張勇巡撫花善遴補○戊

子揚威大將軍簡親王喇布奏副都統阿喀尼於十二月十八日
敗賊葉廷珪等於南安洲擒斬甚眾下部議敘○辛卯江西總督
董衛國奏副將吳友明大破賊寇復新昌上高二縣得旨嘉獎下
部議敘○甲午以建儲加上 太皇太后徽號曰 昭聖慈壽恭
簡安懿章慶敦惠溫莊康和仁宣太皇太后 皇太后徽號曰
仁憲恪順誠惠純淑皇太后○湖廣總督蔡毓榮奏副將四十六
等破賊楊來嘉於黃寶山殺獲無算○乙未 上御太和殿受朝
賀頒詔加恩中外○丙申揚威大將軍簡親王喇布奏賊圍東鄉
縣遣夸蘭大索倫遊擊牛鳳翔等於十二月二十八日殺敗賊眾
斬逆賊朱三城內總兵蔡璋出城合剿東鄉圍解下部議敘○先
是甯南靖寇大將軍順承郡王勒爾錦奏請益兵詔旨詰責至是
奏請處分 上復切責之曰勒爾錦統領大兵進剿逆賊二載有

餘未獲尺土以致師老餉匱坐失機宜今不直陳其罪乃巧飾具奏殊爲不合應卽處分但見在進兵俟旋師之日嚴治其罪○靖逆將軍甘肅提督侯張勇奏天津總兵官趙良棟向隨臣征剿著有功績精明歷練才畧過人臣所深悉請調補甯夏總兵官敕由邊路兼程速赴得旨甯夏要地職任宜重其總兵員缺著改爲提督卽以趙良棟升補令其兼程速赴提督陳福爲國捐軀忠誠顯著陳福弟涿州參將陳奇卽著超補天津總兵官○丁酉以馬喇爲禮部右侍郎由通政使遷禪塔海爲刑部右侍郎由內閣學士遷○隨征福建中路總兵官黃芳世奏海逆鄭錦圖漳州臣弟海澄公黃芳度率眾堅守康熙十四年十一月二十日總兵官吳淑等引賊入城臣弟奮力巷戰勢不能支遂赴開元寺投井身死賊復撈屍寸磔全家男婦盡被殺戮故叔海澄公黃梧亦遭劈棺拋棄標下將弁

蔡隆朱武等悉遭慘殺臣見在少傅公尙之信軍前聞信慘切具疏報聞得旨海澄公黃芳度保守孤城力拒逆賊矢志忠貞勞績素著今據奏叛弁通賊以致城陷黃芳度全家殉難深可憫惻作何恩卹著從優議敘○戊戌浙江巡撫陳秉直奏招撫遂安縣等處耿逆下僞官汪飛龍等一百五十五員兵五千名下部議敘○辛丑 上幸南苑行圍○揚威大將軍簡親王喇布奏副都統額赫納席布等大破麻姑山賊王永召及從姑山賊李懋珠遊擊陳啟善等破賊余流保於萬年縣下部議敘○江西總督董衛國奏逆賊楊玉太踞界山窺伺建昌撫建廣總兵官許貞卻之又破賊於敖家渡蕭家壩等處賊眾奔潰斬獲甚多下部議敘○乙巳予故兵部督捕左侍郎折庫納祭葬○丙午 上還宮○戊申諭大將軍貝勒董額等今將軍侯張勇請赴甯夏秦州諸處兵力甚單

大將軍貝勒董額將軍席卜臣總督哈占等視地方緩急將西安近地之兵應撤者速行撤回發往秦隴聽將軍佛尼勒提督王進寶等酌量調遣以裨戰守○庚戌 上召開列經筵講官塞色黑等至御前親試命各講書○以黨務禮爲內閣學士由太僕寺卿遷○壬子贈福建陣亡守備李吉官廕

二月癸丑朔平南王尙可喜奏臣病日劇寇在門庭臣子尙之孝又統兵在潮臣軀恐有不測則粵省漸至危急請遣威望大臣星馳抵粵以資彈壓得旨王累世勳舊奇猷重望久鎮巖疆勞績懋著自逆賊變亂以來王篤守忠誠殫抒籌畧訓練士卒保障地方剿禦賊寇朕所倚毗今覽王奏稱年老漸衰身嬰痾疾請遣大臣經理廣東事務具見王實心爲國計慮周詳朕與王情同父子誼猶手足覽疏未竟朕心惻然但王屬官兵駐鎮日久地方甯謐措

置咸宜軍民依賴若別遣大臣前往恐該省之事一時未能周知所關匪細王可於諸子中擇才畧素優者遣赴潮州整理軍務大將軍平南王尙之孝回省城侍王左右捍衛封守王其加意調護期於平復以慰朕憂慮眷念至意○丁巳諭兵部湖南百姓遭亂以來困苦萬狀賊糧匱乏勢窮恣行剽掠百姓罹其荼毒如在湯火今大兵剋期進發正解民倒懸之日其令大將軍等遣賢能官同地方官宣布撫民敕諭凡恢復城池後勿妄殺掠以輯人心以綏地方○戊午平南王尙可喜奏逆賊馬雄蓋重民等乘高雷變叛益肆猖獗滿漢大兵退駐肇慶潮逆劉進忠引海寇入犯提督平南大將軍等皆退至惠州請大兵兼程赴援諭兵部頃據簡親王報以每佐領護軍一名驍騎一名交副都統額赫納於正月初十日前赴廣東今粵省告急可令額赫納等倍道速進又奏副都統

穆承格等復始興縣得旨嘉獎下部議敘○己未諭講筵諸臣等嗣後講章稱頌處不得過爲溢辭但取切要有裨實學○賜新授甯夏提督趙良棟鞍馬弓矢甲冑及貂衣一襲白金五百兩並撤御饌一筵賜之○庚申諭兵部粵東用兵二載各將弁勞苦自總兵官以下把總以上俱各加一級仍領本職如故○先是甯夏提督陳福遇害上令副都統恰塔等駐守靈州定邊諸處至是恰塔等奏臣等移駐靈州定邊中有黃河之隔甯夏有事猝難卽至臣請率所部兵屯於黃河對岸以扼兩路要害上因命恰塔等協守甯夏安撫軍民又諭兵部提督趙良棟兼程赴甯夏軍機緊要趙良棟抵甯夏之日一切軍務機宜恰塔拉篤祜等俱與趙良棟會商行事○江西總督董衛國奏僞都督蕭鎮國等窺伺新昌縣遊擊林科知縣盧煌等攻破黃茆嶺等處營寨斬僞副總兵

陳敬等二十七員賊千四百餘下部議敘○壬戌諭兵部大將軍貝勒董額等屯平涼日久賊尙未滅夫秦省不能卽定川賊尙在窺伺者皆由王輔臣未滅故也其以都統大學士圖海爲撫遠大將軍率每佐領護軍二名亟赴陝西總轄全省滿漢大兵斷賊餉道剿滅平固逆孽速靖地方大將軍抵平涼時盡收各將軍敕印遇有分遣酌量給付貝勒董額以下悉聽大將軍節制○甲子甘肅巡撫花善奏逆賊吳之茂自四川出犯踰風水嶺漸偪鞏昌命將軍侯張勇速自甯夏還鞏昌剿禦○乙丑諭議政王大臣等見駐甯夏滿洲蒙古大兵無人統轄其仍授都統畢力克圖平逆將軍印止以所部前鋒赴甯夏統轄滿洲蒙古兵鎮守地方俟草青時酌調鄂爾多斯兵協力進取平固○丙寅浙江總督李之芳奏衢州逆賊負固河西賊黨王國忠屯聚河南轉運糧草臣與平南

將軍賴塔令參將趙得勝率兵前進連破三關陣斬僞遊擊都司等焚毀賊巢下部議敘○戊辰陝西總督哈占奏甯夏與鄂爾多斯接壤今乘內地有事蒙古入邊侵掠甯花寨平羌等堡命理藩院郎中額業圖爲署副都統馳驛赴鄂爾多斯以刼掠情狀曉諭其王貝勒等令其嚴禁毋入內地擾害仍令鄂爾多斯兵整理甲冑器械以俟調遣○己巳平南王尙可喜奏賊犯惠州肇慶諸處省會危急 上諭粵省要地儻有疏失爲害不小頃雖遣調江西兵仍恐單薄今以兗州每佐領驍騎兵一名蒙古兵七百名調赴江南其見駐江南每佐領驍騎兵一名蒙古兵六百名及駐防徽州池州滿洲蒙古兵七百名令將軍哈爾哈齊統領馳赴粵東如有稽遲坐以失誤軍機之罪其哈爾哈齊所用平寇將軍印留付副都統科爾科代鎮守江南其徽州池州餘兵七百名恐難捍禦

地方或令見駐安慶提督移鎮池州或撥蘇州駐防五百甲兵往駐徽池將軍總督等公同酌量調遣至山東兗州戍防不可無兵大將軍圖海所統兵內分每佐領一名往山東駐守俟盛京兵到時遣發圖海軍前○辛未諭兵部前命康親王傑書爲大將軍平定閩省王奏先滅浙寇再進福建卽允其請後授貝子傅喇塔爲將軍進取黃巖乃借稱修橋備船展轉遷延爲日甚久屢下詔嚴催始取黃巖前赴溫州其時曾言紅衣礮至卽取溫州今據王報稱礮已齊集而溫州之得與未得並未聲明師行猶豫若此何時始得入閩王貝子率領大兵駐浙曠日持久以致師老餉匱今溫州如剋期可取卽當速行進取儻不能卽克宜酌量分兵留守王親統大兵卽克取福建如仙霞嶺路險難進或由分水關入或別從何道而進當相機作速進兵福建一定則江西之兵可以全力

勦賊而吳三桂亦可指日滅矣王貝子係朕懿親大小將弁皆素所信任當各效心膂奮力前驅如仍瞻顧不前則師益老餉益匱貽誤大事莫此爲甚王等其勉副委任乘此事機作何進止速議以聞○壬申予故江西巡撫白色純祭葬諡勤僖○癸酉 上如鞏華城道中諭扈從諸大臣及侍衛等曰朕周視沿途田閒春麥正當盛長著傳諭扈從官員人等悉循路而行勿得蹂踐春田其嚴禁之○甲戌諭兵部貝勒尙善等統率大兵屯駐岳州將及二載並未移師前進作攻城破賊之勢因循坐守徒令師老財匱今因大將軍安親王由袁州進取長沙湖南逆賊遂欲分我大兵之勢來犯江廣前據報岳州賊眾分遣往援彝陵等處則岳州賊勢已分貝勒尙善貝子章泰公蘭布皆朕懿親委以重任都統朱滿護軍統領額司泰副都統路什阿晉泰前鋒統領噶爾弼等皆以

勝任擢用巡撫韓世琦提督桑峨亦以才幹著稱擢付封疆重任
今岳州滿洲蒙古之兵爲數不少又提督桑峨標下士卒頗多湖
南賊勢旣分卽應整理甲兵爲進取岳州之勢可取則取不可取
須覘賊虛實或發兵聲言過岳州取長沙賊出卽擊殺之使逆賊
之勢潰亂不能分援他處則江西廣東可以少息而大將軍安親
王亦從容克取萍鄉進圖長沙矣尙善等並不思勦滅賊眾恢復
地方副朕委任之意又不偏近偵探逆賊情形度有機會奮力前
進賊兵分遣各處安坐罔聞止知自守汎地各保身軀不能少進
尺寸如謂逆賊深其壕塹多用火器以傷我軍如值大雨之時其
火器尙可用耶總之不實心任事致賊得以任意應援貽誤軍機
莫此爲甚若仍前不改逆賊何日得滅地方何日得平尙善等以
文到日卽宜作攻取岳州發兵長沙之勢以分賊力儻有機可乘

速行進取如有未便將情由奏聞○先是廣東告急遣將軍哈爾哈齊統江甯兵赴援至是賊將高大傑等乘安親王進取袁州萍鄉之隙擁眾數萬圍吉安大將軍簡親王喇布以聞 上諭吉安爲進通廣東要路今旣被圍應速發兵救援駐江甯將軍哈爾哈齊於率赴廣東兵內選其半馳往南昌與大將軍簡親王副將軍希爾根等會商卽於所帶兵及南昌兵內酌量派出領赴吉安破賊解圍通入廣之路此路旣通哈爾哈齊仍率兵赴粵其所留江甯之兵交賢能夸蘭大俟兗州兵到卽令遄征吉安情形並移文大將軍安親王知之以便隨機策應○乙亥江西總督董衛國奏吉安被陷得旨吉安關係甚重大將軍簡親王喇布副將軍希爾根總督董衛國等速議恢復以通粵路將軍哈爾哈齊率師星赴江西亦與簡親王等商議協力攻剿尋喇布奏欲暫棄廣信撤回

將軍額楚等兵並調樂平兵勦吉安侯吉安復後再取廣信得旨
廣信兵既撤回饒州似屬可虞簡親王等可確議固守饒州勿致
有失○丁丑賜撫遠大將軍都統大學士圖海 御用衣帽團龍
補服黃帶等物 御乘名馬二匹散馬二百匹○戊寅 上御太
和殿賜撫遠大將軍都統大學士圖海敕印○江西總督董衛國
奏大將軍安親王岳樂統大兵進勦抵萍鄉派滿漢官兵爲四隊
分道進擊大敗賊眾破其十二寨斬首萬餘級僞將軍夏國相遁
遂復萍鄉得旨嘉獎下部議敘○諭兵部今安親王將賊固守之
地攻破賊已喪膽宜卽乘機直取湖南但我兵進取湖南時逆賊
吳三桂或撤諸處賊兵往長沙抗拒亦未可知著行文荆岳大將
軍王貝勒等飭勒兵馬時加偵探乘機進勦○辛巳 上御經筵
○贈陝西殉難波羅營副將張國彥太子太保予世職○壬午陝

西提督王進寶等奏賊薄秦州屯踞北山阻斷臨鞏之路秦州之兵無從覓餉且兵力單弱戰守皆難 上諭大將軍貝勒董額及將軍席卜臣佛尼勒都統赫業總督哈占巡撫杭愛花善提督王進寶等逆賊來犯秦鞏如何堵剿大兵糧餉如何輓運不絕著公同商酌以行至席卜臣既遣夸蘭大聶勒庫率兵三百赴隴州隴州所有副都統希福亦宜酌量分兵應援秦州○是月免江西南昌甯州等十七州縣衛去年旱災賦

三月癸未朔諭兵部海澄公黃芳度自逆賊變亂以來矢志忠貞保守孤城勦殺逆賊屢建大功及叛將吳淑句引逆賊潛獻城池海澄公遂督兵血戰率領闔家殉難以報國恩以盡臣節忠勇可嘉其優贈王爵賜諡忠勇照多羅郡王例遣大臣致祭令黃芳世仍襲海澄公爵黃芳泰給以拜他喇布勒哈番其同時殉難副將

蔡隆贈右都督遊擊朱武贈都督僉事各致祭一次廕子弟一人以守備用外委官張瓊陳謙戴鄰等俱贈都司僉書廕子弟一人以千總用○丙戌陝西提督王進寶奏臣於二月二十五日會同振武將軍佛尼勒等進剿北山賊渠吳之茂迎敵大敗之生擒偽總兵徐大仁陣斬偽總兵四員僞參遊等二百餘員殺獲無算下部從優議敘○丁亥揚威大將軍簡親王喇布奏署副都統阿喀尼總兵官高登科等於二月十九日敗賊於萬年縣僞總兵王用等據鄱陽縣之沙蘭栗嶺等處遣兵分擊之焚賊巢斬獲無算下部議敘○己丑振武將軍佛尼勒奏臣等遣兵斷賊糧道至羅家堡鹽關等處遇賊運送糧草敗之陣斬僞官兵弁甚眾下部議敘○庚寅奉命大將軍康親王傑書奏臣屢檄貝子傅喇塔速取溫州傅喇塔稱舟師不至不能攻取且檄催副都統穆赫林紀爾他

布倭申巴圖魯提督段應舉等皆彼此瞻顧不前臣察處州台州
杭州衢州駐兵皆不便輕發請調江南廣信兩處兵並調崇明京
口戰船水師以資進剿 上諭貝子傅喇塔始以待發紅衣礮爲
辭今又云必須戰船且覽屢次移文前後言語互異並無定見殊
負委任我朝用兵紀律嚴肅從未有官兵抗違主帥不遵軍令者
今副都統穆赫林等違將令不前蔑視國法俟事平日嚴加治罪
至江南廣信兵已調赴吉安別無可調之兵崇明京口係濱海重
地舟師不可分遣王奏温州大捷斬獲二萬餘級則餘賊無多何
難翦滅速復温州且命王爲大將軍專委任王以速定閩疆並非
欲王但居閒地分遣諸將而已今王駐紮金華將及二載不親統
官兵進剿徒以空文往來爲事則逆賊何日可滅王其速檄貝子
傅喇塔剋期取溫如或不能卽撤回傅喇塔暫駐金華王卽親往

督率官兵攻克温州合兵進取福建毋得仍前遲延瞻顧貽誤軍機負朕委任之意○諭安遠靖寇大將軍貝勒尙善爾等統率大兵閒坐日久未嘗進寸步朕指授軍機惟以雨雪爲辭仍退縮不前各執全軀保身之意今安親王已復莽鄉醴陵二縣進取長沙湖南逆賊豈盡棄他處而獨固守岳州耶揆此則不實心用力之處顯然矣爾等宜痛改前非奮發效力乘湖南逆賊騷動之時仍遵前旨速行進兵毋得坐失機會○奉命大將軍康親王傑書奏將軍貝子傅喇塔等圍温州二月十七日夜耿逆僞都督曾養性僞將軍祖宏勳等合水陸四萬餘賊來犯副都統紀爾他布等擊敗之陣斬僞都督孫可得僞總兵李節三百餘員殺賊二萬餘仍撥官兵立營江岸以遏賊眾青田去路賊勢大挫又奏副都統穆赫林敗賊於八帶橋馬哈達等敗賊於張村下部議敘○癸巳安

遭靖寇大將軍貝勒尙善等奏逆賊吳三桂遣僞將軍馬寶等分
路應援長沙諭大將軍安親王兵已經深入今赴援之賊甚多恐
相持遲延時日貝勒尙善等宜乘機速行攻取岳州絕賊餉道若
慮岳州兵力單薄可調武昌兵以資防守其彝陵諸處賊勢旣分
順承郡王勒爾錦貝勒察尼等或攻破彝陵上流賊眾或整理舟
師以張渡江之勢俾賊潰亂不能救援長沙一帶儻有機會可進
卽渡江酌量速進至南漳逆賊旣經退回卽調南漳諸處大兵赴
荊州併力破賊大將軍王等仍量留官兵同總兵官劉成龍防守
南漳○甲午甯南靖寇大將軍順承郡王勒爾錦奏鎮安將軍都
統噶爾漢等敗賊於南漳縣之靈機寨焚其大營吳逆僞將王會
等遠遁下部議敘○戊戌復設嶺南兵巡道一嶺東兵備道一羅
定州兵備道一改廣肇道爲嶺西兵巡道惠潮道爲嶺東兵巡道

高羅道爲嶺西兵備道○壬寅贈殉難陝西提督陳福公爵給三等精奇尼哈番世職予祭二次諡忠愍○江西總督董衛國奏二月二十五日撫建廣總兵官許貞等敗賊於楊華山等處斬僞總兵揭重信建昌附近西南二面之賊焚巢遁下部議敘又奏千總趙廷棟以十五騎敗賊於吉水縣斬僞副將謝玉元下部議敘○揚威大將軍簡親王喇布奏署副都統阿喀尼等敗賊於奉新縣下部議敘○甲辰副都統恰塔奏平涼賊僞總兵陳甲等以步騎一萬五千犯靈州臣統兵擊卻之下部議敘○乙巳 上幸南苑行圍○賜彭定求等二百九人進士及第出身有差○浙江總督李之芳奏三月初八日官兵復開化縣招撫僞官六十餘員賊兵五千餘名救出難民一萬餘口得旨嘉獎下部議敘○己酉安遠靖寇大將軍貝勒尙善奏護軍統領額司泰副都統魯西巴圖魯

等統領岳州水師於三月初九日進剿屢敗賊眾克取君山下部
議敘○庚戌 上還宮○振威將軍佛尼勒等奏平涼僞總兵李
國良率賊八千餘由靖甯來援秦州 上命佛尼勒同靖逆侯張
勇巡撫花善等商酌調度剿滅秦州援賊恢復靖甯○甯南靖寇
大將軍順承郡王勒爾錦奏臣統大兵於三月十八日自荊州渡
江前鋒參領瓜爾察敗賊於南岸之文村又敗之於石首縣蕩寇
將軍貝勒察尼敗賊於太平街焚毀賊營下部議敘○辛亥鎮西
將軍都統席卜臣奏副都統鄂泰等敗賊於寶雞縣之紅崖堡下
部議敘○壬子諭揚威大將軍簡親王喇布吉安係通廣東要路
宜速恢復乃以調綠旗兵爲辭因循日月殊誤軍事卽遣哈爾哈
齊額楚等恢復吉安以通粵道○是月免直隸永清等五縣去年
被水額賦

夏四月甲寅賑河南鄭州饑○丙辰甯海將軍貝子傅喇塔奏臣
屢奉康親王檄催心思惶惑以致前後語言違謬今謂臣大負信
任之意夫復何辨但王將行僅回文湊合上奏以爲臣誤王進閭
之計似覺冤抑臣前駐台州時王以俟破台州進閩爲言故臣一
得黃巖卽遣副都統倭申巴圖魯領兵赴王軍前乃又云候取溫
州以是責臣臣亦何辭相抵乎今蒙 皇上寬恩不卽治罪惟勒
期速下溫州臣敢不力戰自效但環溫皆河我兵不能猝進耳疏
入 上命康親王酌量留兵圍溫州親統大兵赴衢勦滅江山逆
賊以取福建仍頒諭曰王貝子皆朕懿親受任討賊師克在和近
覽王貝子屢次章奏似不相輯睦嗣後務同心一志合謀併力以
奏膚功毋各執己見貽誤封疆負朕委任至意○丁巳揚威大將
軍簡親王喇布奏副都統尼滿等敗賊於常興明山等處下部議

敘○辛酉江西總督董衛國奏賊犯廣東總兵官苗之秀副將吳啟鎮等相繼叛尙之信陰與賊通受吳三桂招討大將軍僞號於二月二十一日守其父尙可喜第倡兵作亂鎮南將軍舒恕等引兵歸副都統莽依圖自肇慶突圍出總督金光祖巡撫佟養鉅陳洪明俱降賊 上諭廣東變亂江南江西殊屬可虞若閩粵諸賊會犯京口等處則江南兵單難以防禦且江西告急自江南往援甚便官兵不可不增其調大將軍圖海所領盛京兵一千名及駐防兗州每佐領驍騎一名遣赴江南發京城每佐領兵一名駐兗州其江南滿洲蒙古兵令將軍華善用平寇將軍印統轄以學士薩海署副都統科爾科代爲參贊副都統楊鳳翔以安南將軍印駐防京口其遣赴江南之兵到日將軍華善王之鼎及參贊大臣督撫等會同整飭軍馬以待調遣尋簡親王喇布果請兵援江西

上卽命此兵抵江南養馬後速行酌遣江西應援又諭粵東事如此則長沙宜急攻取今貝勒察尼總督蔡毓榮旣回荊州則自河南發往荊州之兵可速遣赴岳州貝勒尙善亦分兵自陸路趨長沙與安親王協力進取簡親王等應卽令將軍哈爾哈齊額楚等速取吉安與將軍舒恕等合兵禦閩粵諸寇以繼安親王大兵之後○癸亥靖逆將軍甘肅提督侯張勇奏臣會同護軍統領傑殷遣兵敗賊於甯遠縣之馬烏鎮下部議敘○揚威大將軍簡親王喇布奏署副都統揚古代等進兵饒州三月二十五日敗賊於倫吉橋二十六日復餘干縣得旨嘉獎下部議敘○戊辰加靖逆侯張勇少保仍兼太子太保以敘恢復洮河二州功也○振武將軍佛尼勒奏官兵敗賊於清水縣陽平里等處下部議敘○甯南靖寇大將軍順承郡王勒爾錦以三月二十七日擊賊於太平街

失利退兵荊州具疏請罪 上諭勒爾錦身爲大將軍統領精兵
征討逆賊乃抵荊以來地方多陷且躑躅不前以致孫延齡耿精
忠等相繼叛亂徒勞我師虛糜國餉坐守三年未獲寸功察尼身
爲參贊不能助大將軍勦除兇逆拓地收疆均應解任嚴加治罪
念其身任行間臨敵對壘姑留原任立功自效以贖前愆○辛未
趣安遠靖寇大將軍貝勒尙善等分兵赴長沙諭之曰當安親王
未取萍鄉時貝勒尙善等曾言得每佐領兵四名即可分勦逆賊
斷其餉道今安親王已克萍鄉深入長沙故如貝勒等所請增發
官兵赴岳州因命分岳州兵赴長沙又稱沿途水漲賊阻難以驟
至請將官兵發往江西若發往江西轉令赴援則稽滯日月如謂
水漲賊阻安親王攻破萍鄉直抵長沙豈沿途遂無賊無水相阻
坦途前進耶如此展轉遷延地方何時得甯貝勒尙善等其以文

到之日卽多發官兵由三眼橋或通城等路速赴長沙勿得仍前遲緩貽誤軍機尋尙善等覆奏已令副都統阿進泰率八旗驍騎兵八百名蒙古綠旗兵各五百名於四月二十六日由通城赴長沙○戊寅陝西總督哈占奏逆賊踞龍駒砦及資峪鋪阻塞商州商南之路商南縣知縣盧侯遇害 上諭將軍吳丹席卜臣及總督哈占等會商剿賊毋致蔓延商南與河南接壤河南巡撫總兵官等亦酌調官兵分守邊隘以備不虞○庚辰湖廣總督蔡毓榮奏川逆譚宏直偪鄖江北岸楚逆洪劉等賊出掠鄖江以南提督佟國瑤等遣發鄖陽滿漢官兵分布剿禦三月二十一日敗賊於坪溝二十八日敗賊於黃畈四月初四日敗賊於九里岡等處初九日敗賊於南岸初十日十一日連敗賊眾擒斬無算焚其戰艦獲器械甚多下部議敘○辛巳江西總督董衛國奏袁臨總兵官

趙應奎等敗賊於鐵山界仙居橋署副都統揚古代等敗賊於餘干縣之潤溪斬首二千餘級遊擊林科等敗賊於瑞州之舒林橋斬千餘級俱下部議敘○靖逆將軍甘肅提督侯張勇奏四月十六日賊眾萬餘直犯通渭縣城守官以兵單逃避山寨臣等與護軍統領傑殷自伏羌進發與撫標遊擊岳鎮邦等合兵援剿行至十八盤坡遇賊全隊直前擊敗之乘勝復通渭賊四散奔逸追斬七百餘級見在會將軍佛尼勒提督王進寶商酌迅發秦兵撲剿務盡得旨嘉獎下部議敘

五月壬午朔日有食之○癸未 上至鞏華城駐驛○甲申 仁

孝皇后忌辰行再期致祭禮 上回宮○予江西死事屯墾都督僉事洪徵卹蔭○揚威大將軍簡親王喇布奏江西南昌吉安饒州等府先後招撫逆賊共計偽官四百五十餘員賊兵一萬五千

餘名救出難民一萬四百餘名下部議敘○江西總督董衛國奏
袁臨總兵官趙應奎等於四月十八日復萬載縣得旨嘉獎下部
議敘○乙酉議政王大臣等議逆賊楊來嘉等盤踞鄖陽不時竊
發請復設鄖陽撫治以資控制命以原任河道總督楊茂勳爲鄖
陽撫治設標營如巡撫例○江西總督董衛國奏提督趙賴等遣
兵於都昌縣土塘山大敗賊眾下部議敘○丙戌左都御史介山
奏京師乃五方雜處之地奸宄潛伏御史巡城莅任止六月差滿
正在訪詢民隱究察奸宄之際卽以差滿更換委任不專嗣後滿
漢御史巡城應限一年更換庶民隱可訪奸宄易察從之○奉命
大將軍康親王傑書奏賊首馮公輔等攻陷宣平縣夸蘭大黨喀
里等率兵於四月初八日敗賊於陶村又敗之夏灣乘勝追至宣
平賊列礮迎敵我兵分三路擊敗之復宣平生擒僞遊擊都司干

總把總等八員斬首九百餘級又鎮標遊擊王世相等敗賊於崖
吭督標遊擊高世英敗賊於上陶夸蘭大沙爾圖敗賊於神塘追
殺二十餘里拔賊木柵六層焚土城五座斬僞遊擊等及賊兵七
百餘級得旨嘉獎下部議敘○鄂羅斯察漢汗遣其臣尼果賴罕
伯理爾鄂維策貢方物奏稱鄂羅斯僻處遠方從古未通中國不
識中國文義不諳奏疏儀式今特向化輸誠願通貢使得旨鄂羅
斯國所處甚遠誠心向化特遣其臣貢獻方物甚屬可嘉所奏之
處議政王大臣等議奏○丁亥甯夏提督趙良棟奏自提臣陳福
遭變之後逆賊直犯甯夏河東諸堡俱被脅從今二十餘堡一聞
招撫相繼投誠 上諭河東各堡因地狹民稀不能敵賊一時被
脅誠非得已其概從寬宥該提督仍加意撫綏以副朕惠愛元元
至意○欽天監治理麻法南懷仁奏本年五月朔日食依古法推

算應食五分六十秒依新法推算應食二十微臣等登臺測驗本日酉正一刻日食未及一分戊初初刻十分復圓其古法所推分數既失之甚遠而新法亦不盡符合者乃清濛之氣使然也按交食厯指等書言清濛氣者地中游氣時時上騰其質輕微畧似激清之水能映小爲大升卑爲高如日月入時與地平相近游氣掩映比中天時望之其光較大此明驗也今五月朔日食原不過二十微因濛氣之故自平地視之則見爲不及一分也至濛氣於四時之中隨時隨地各有不同如濛氣加厚則日食之分數愈多不可膠柱豫定下部知之○癸巳揚威大將軍簡親王喇布奏粵省韶州南雄俱已變叛將軍舒恕額赫納等兵退守南贛福建巡撫楊熙總兵官拜音達禮等亦各率所部官兵隨滿兵引還 上諭舒恕額赫納等嚴守南安贛州梅嶺以保固江西其署副都統莽

依圖總督金光祖信息及平南親王尙可喜存亡並確探以聞尋
總督董衛國奏南安兵餉缺乏官兵遂不能守今閩粵諸寇又侵
犯贛屬地方孤城危急 上諭贛州旣危應速取吉安合兵剿賊
簡親王等亟檄將軍哈爾哈齊額楚提督趙賴等剋取吉安會合
將軍舒恕額赫納兵撲滅閩粵諸寇並檄舒恕等酌量儻可由贛
攻吉卽分兵夾攻之○戊戌免陝西延綏所屬被寇州縣賦十之
三中部等三州縣十之二已完者抵今年正賦○己亥贈福建陣
亡守備楊士祥官廕○庚子兵部題甯夏提督陳福殉難給以三
等精奇尼哈番准令承襲但其家居蜀省應將伊親弟陳壽之子
陳世怡暫行襲職俟西蜀恢復之日仍以陳福之子襲替從之○
乙巳兵部遵旨議覆海澄公下游擊黃藍三次齎奏來京值海澄
失守全家被陷應從優授爲參將事平日卽補用從之○撫遠大

將軍都統大學士圖海奏本月十七日臣至平涼越一日率兵至城北護山墩相視形勢賊眾萬餘突來迎戰步前馬後布列火器挨牌我兵分路進擊自己至午大敗賊眾斬僞總兵二人餘賊被傷及墜崖死者甚眾獲馬匹器仗不可勝計下部議敘○丙午贈湖廣死事守備王光前官廕

六月壬子朔江西總督董衛國奏浮梁縣先已恢復因僻處山城兵馬難以駐守遂回景德鎮紮營五月十二日賊渠陳茂生等率老巢賊眾五萬有餘屯紮鳳凰山等處復犯浮梁饒南總兵官高登科與參領諾木齊等三路進剿賊眾大敗生擒賊渠陳茂生及僞遊擊都司守備王國柱等六十餘人追殺十餘里逆賊奔竄四散下部議敘○撫遠大將軍都統大學士圖海奏臣統兵抵平涼大敗賊於平涼城下卽遣劄授參議道周昌入城招王輔臣王輔

臣隨遣其副將謝天恩乞降 上命頒赦詔撫慰之○甲寅命內大臣哈岱一等侍衛阿喇尼往兩喀喇沁兩土默特兩翁牛特敖漢柰曼四子部落蘇尼特等十旗察閱兵馬量調每佐領兵丁聽遣○揚威大將軍簡親王喇布奏南安變亂將軍舒恕等兵棄城退數十里而省城存兵無幾有事無可調發 上命以駐防池州滿兵每佐領一名將軍華善遣才能夸蘭大一人領之江甯蒙古兵七百名令署副都統額思赫領之俱赴江南喇布又奏攻取吉安非紅衣礮不可請敕江南總督選攻城大礮十具速行運至軍前並請先發江南附近兵以援江西危急得旨調江南兵援江西已有前旨今復調每佐領兵一名前往此二隊兵到日聽大將軍等公同商議視地方緩急便宜調遣其攻城大礮移文總督阿席熙等速行解發○予故致仕太子太保左都御史孫承澤祭葬○

丙辰江西總督董衛國奏水路自淶口至唐山口賊船不時出犯復有孫延齡賊船七十餘隻自衡州來泊蒼頭鋪且遣賊三千侵犯攸縣上諭逆賊知安親王進取長沙欲斷大軍後路窺伺袁州亦未可定江西既發有江南大兵省城又有總督駐守簡親王喇布副將軍希爾根其以文到之日卽撤無事地方官兵赴袁州駐鎮勦禦賊寇○丁巳靖逆將軍甘肅提督侯張勇鑲紅旗蒙古都統赫業奏五月二十四日進兵樂門徧察地形賊紮營十一座相爲聯絡其南北山梁二營占踞險阻欲以圍困我師臣等公議安營於山梁中間以分賊勢並分滿兵爲二一攻賊南營一堵截援兵提標兵亦分爲二一攻賊北營一堵截援兵令每兵各覓草一束以填賊營壕塹正安營閒有二營逆賊齊出都統赫業率滿兵與南營逆賊對壘臣率標兵與北營逆賊對敵各奮力撲剿逆

賊敗奔入營已刻僞汪總兵從北路僞李將軍從南路率兵救援滿漢兵各分路堵截之衝戰數陣槍礮齊發賊遂敗北不能進援而山上南北二營逆賊見有援兵死守營牆我兵鏖戰六陣用所帶草束填壕滿漢官兵當先用命撲進南北二營賊兵大潰陣斬僞總兵等並賊眾千餘級獲帳房器械無算得旨嘉獎下部議敘○江西總督董衛國奏廣信營中軍守備楊名進兵上窯施家地方殺入賊巢活擒賊渠黃尙志及僞官孔世榮等七人斬獲甚眾下部議敘○靖逆將軍甘肅提督侯張勇奏逆賊侵犯甯遠遊擊劉廷棟等奮勇堵禦擊敗賊眾下部議敘○己未湖廣總督蔡毓奏南漳總兵官劉成龍呈首逆賊楊來嘉所給僞書得旨鎮臣劉成龍出首逆書忠貞可嘉著該部議敘○癸亥安遠靖寇大將軍貝勒尙善奏江西解送軍前得勝船不宜於岳州請易爲烏船

上諭尙善受大將軍之任不務速破逆賊每生事端虛糜歲月宜不允所請嚴行處治但今與賊對壘可令安徽巡撫靳輔速遣烏船十隻解赴岳州○乙丑奉命大將軍康親王傑書等奏甯海將軍貝子傅喇塔統兵過三角嶺循江邊大路前進有僞都督曾養性等率賊船百餘隻泊江中又有賊千餘在得勝山下古溪地方當路立營對江亦立營設礮因令副都統紀爾他布總兵官陳世凱等分爲兩隊攻取賊營以開大路又令漢軍兵上得勝山用礮打江中賊船並對江賊營又令漢兵埋伏山之兩傍林內於五月十二日大兵齊進攻拔其營殺賊三百餘級餘賊敗走遇伏兵殺傷甚多江中賊船被礮打沈大路已開又於五月二十四日副都統紀爾他布等行至溫溪渡有僞都督馬成龍僞總兵陳貴等領五千餘賊前來衝犯隨令前鋒護軍驍騎兵居中綠旗兵分爲兩

翼齊擊敗之追殺十餘里計殺賊千餘級生擒賊百餘名降僞都司鄭雄僞遊擊馬國銘等得旨嘉獎下部議敘○靖逆將軍甘肅提督侯張勇奏逆賊王輔臣勢窮引川逆爲援犯通渭縣提督王進寶率領官兵親行指揮分路進剿擊敗賊眾招降僞官復靜甯州城得旨嘉獎下部議敘○戊辰諭兵部近覽大將軍簡親王喇布總督董衛國等奏尙之信背恩反叛逆賊孫延齡馬雄等分路來寇江西袁州諸處閩賊亦乘機侵犯江西逆賊吳三桂部下高大傑死守吉安大兵尙未克復等語見在江西兵力單弱分布禦防守地方又欲接應大將軍安親王兵實難支應前貝勒尙善請分岳州兵遣發江西大有裨益今阿晉泰韓世琦雖駐長沙其自京師發出每佐領兵四名見到岳州可將兵合計量留防守其餘官兵卽令起程並嚴飭將弁兼程速往尋尙善奏自河南每佐

領兵一名更增以盛京兵及外藩蒙古兵共一千名令署副都統
尼雅翰領赴江西於六月二十七日由武昌起程○庚午和碩額
駙尙之隆以尙之信叛率子弟詣部請罪 上以尙可喜矢志勤
勞悉宥尙之隆等罪屬下人員亦從寬免○增直隸各省儒學教
職各一○戊寅撫遠大將軍都統大學士圖海奏臣接奉赦詔於
本月初六日復令周昌齋詔人城次日王輔臣遣僞布政使龔榮
遇等率士民詣軍門獻軍民冊又遣其子王繼貞及僞總兵蔡元
等繳所受吳逆僞敕二紙僞平遠大將軍印陝西東路總管將軍
印各一顆及諸僞劄臣見王輔臣尙懷疑懼於十三日復遣周昌
並臣姪前鋒侍衛保定前往溫言開諭王輔臣於十五日卽至臣
營叩頭謝恩遂入城薙髮率眾來降固原僞巡撫陳彭慶陽僞總
兵周揚名下峪關僞總兵王好問關山僞副將孔印雄及雲南土

司總兵陸道清等各率所屬官兵相繼來降 上諭大將軍圖海

恭承簡命秉鉞臨邊卽宣布恩威勦撫並用平涼一帶旬月綏平
具見籌畫周詳布置神速克副委用立奏膚功朕心深爲嘉悅著
從優議敘有功人員一併議敘具奏王輔臣旣感戴國恩悔罪投
誠著復其原官加太子太保擢靖寇將軍立功贖罪部下官弁照
銜給劄兵民酌量安插圖海又奏差去招撫王輔臣之周昌乃七
品錄用職官隨振武將軍吳丹來在潼關臣知其人才能帶至平
涼軍前臣與參贊軍務諸臣會商欲遣周昌前往招撫而周昌欣
然應命並無難色遂給以參議道銜臨行之時周昌訴伊父亡時
母孫氏剜目破面觸棺盡節而死未蒙旌表今情願爲國捐軀表
揚母氏語畢遂冒矢石挺身入城將 皇上浩蕩之恩與招撫之
意盡行宣布往來數次實獲成功伏乞 皇上俯念周昌爲母捨

身之孝爲國忘軀之忠敕諭該部旌表周昌之母優加恩卹以酬周昌之功則人知鼓勵遠近咸服矣得旨周昌之母孫氏著遣官致祭給銀建坊旌表圖海又奏臣等遵旨到秦見流民滿野不但陷賊地方不得耕種卽未被兵之百姓因轉運大兵糧草亦困苦至極乞特加軫恤凡民間拖欠之錢糧並解運漢中被劫糧石腳價一併免追其陷賊不得耕種之錢糧祈敕部酌議暫行蠲免以息殘喘俟少有起色再行催徵庶人興樂生之心再霑昇平之福得旨議政王大臣會同議奏尋議政王大臣等行文該督撫查明被兵各州縣錢糧額數及舊欠追徵數目一併蠲免從之○己卯撫遠大將軍都統大學士圖海奏平涼投誠猱苗官兵求回原籍上諭猱苗官兵若留內地恐伊等父母妻子或被逆賊殘害其官員各加一級兵丁酌量賞賚俱發回原籍並曉諭令招撫從賊

人民儻立有功績准與優敘○命優升投誠雲南土司總兵陸道清爲左都督兼太子少保投誠參將黃九疇劄委參議道周昌等俱爲布政使往湖南招撫○揚威大將軍簡親王喇布奏本月初六日僞將軍耿繼善焚毀營盤並建昌新城諸賊逾關遁走上諭大將軍康親王傑書等耿精忠撤建昌諸賊其爲海寇所偪無疑我兵宜乘機前進其令大將軍傑書將軍貝子傅喇塔賴塔總督李之芳速勦閩寇酌量招撫勿坐失事機

東華錄

康熙十八

臣王先謙敬編

臣周瀚著恭校

秋七月辛巳朔鎮南將軍哈爾哈齊等率水陸官兵進剿吉安逆賊五月二十六日擊敗賊眾克其外城遣署前鋒參領郭濟奏捷上命郭濟傳諭簡親王等曰江西距京四千里朕知之甚悉王以宗室懿親不乃心國家料理軍務恢復地方惟坐守省會日事騎射以圖安逸殊負委任之意今逆賊高大傑竊踞吉安朕旨到日卽宜剋期攻取副將軍希爾根不思報國日駐省城安逸自便性尤偏執軍中每分兩翼獨庇其右翼嗣後宜痛改前非力圖報效哈爾哈齊額楚亦宜遵朕命速取吉安勿得推諉坐失機宜且將軍覺羅舒恕莽依圖穆承格見駐贛州南安王等宜協力攻取

進兵兩粵凡行兵之道愛民爲先若百姓富足糧餉充裕則徵調
師徒庶不至有困乏自今大兵所至務禁戢擾掠以稱朕撫綏兆
民至意○定遠平寇大將軍安親王岳樂奏逆賊船集長沙城下
我兵無戰船難以破賊請發江西得勝船十隻及安慶九江沙船
五六十隻赴長沙又長沙附近林木頗多並乞敕巡撫韓世琦伐
木造船 上諭得勝船用之湖中非長江所宜其以岳州沙船轉
送長沙如安親王所請著江西總督董衛國巡撫佟國禎等採辦
物件雇募工匠運赴長沙軍前修造戰艦如不敷用江南總督阿
席熙安徽巡撫靳輔等速行採辦雇募轉送江西一併運致仍豫
行安親王遣兵迎取付韓世琦督造○浙江提督石調聲奏官兵
敗賊於缸窯等處復象山縣得旨嘉獎下部議敘○議政王大臣
等遵諭議覆鄂羅斯察漢汗向化入貢應行賞賚其使臣尼果賴

不嫺典禮不便給與敕書應令理藩院諭來使云爾主欲通和好
應將本朝逋逃根忒木爾遣還另簡使臣遵中國禮行方許照常
貿易從之賜鄂羅斯察漢汗使臣等鞍馬袍服等物○靖遠將軍
甘肅提督侯張勇奏川逆盤踞樂門臣因兵單約提督王進寶統
兵會剿王進寶於六月十九日率師至樂門安營未定賊潛來刼
營官兵環繞衝擊逆賊大潰死者不計其數生擒偽總兵遊擊都
司守備等官卽於軍中斬之下部議敘○丙戌以董安國爲刑部
右侍郎原任戶部左侍郎○以丁思孔爲湖北布政使由安徽按察使遷○壬辰
甯夏提督趙良棟奏臣按問謀害原任提督陳福者參將熊虎等
四人實爲首惡見在撥兵拘禁伏候敕旨 上諭吳逆背叛以來
潛布僞書煽惑人心原任提督陳福妻子雖在四川毫無瞻顧篤
志忠貞剿禦賊寇恢復城池功績茂著及率兵進剿固原中途遇

害前因變出倉卒不能救護之兵弁俱釋不問其倡謀爲亂手刃主將者國法難寬今既察明熊虎等四人實係首惡卽行正法以懲奸宄其餘兵弁各守汛地毋得牽連嗣後如有首告者卽以其罪罪之其徧諭甯夏提標官兵知悉○靖逆將軍甘肅提督侯張勇奏僞將軍李良桂犯岷州遣兵於梨川地方敗之下部議敘○甲午吏部議覆大學士巴泰等奏參大學士熊賜履將陝西總督哈占題報獲盜犯開復疏防等官之奏誤票三法司嚴議具奏奉旨查問熊賜履欲掩飾己過私取草籤嚼毀以大學士杜立德所票另疏草籤扯去紙邊改寫小字希委咎於杜立德殊玷大臣之職應將熊賜履革職得旨熊賜履著革職○揚威大將軍簡親王喇布奏逆賊侵犯新淦署副都統楊古代等遣發官兵迎敵於博嶺山大敗賊眾陣斬賊七百餘級下部議敘○庚子 上幸南

苑行圍○癸卯以慕天顏爲江甯巡撫

由江蘇布政使遷

○贈死事江西

南豐知縣王應魁官廕○揚威大將軍簡親王喇布奏官兵於七

月十一日進取金谿賊首楊益茂盤踞縣城倚山立營共二十餘

座大兵奮力進攻破其木寨直抵山下陣斬三十餘級恢復縣城

得旨嘉獎下部議敘○丙午

上回宮

○福建提督段應舉奏續

雲地方通金華處州兩府爲糧運要途逆黨蕭君球率賊侵犯隨

征總兵官劉顯芳遣兵進剿於黃鳥嶺攻破木城屢敗賊兵斬獲

甚眾下部議敘○丁未以姚文然爲刑部尙書

由左都御史遷

○河南土

寇張成武侵擾永甯縣駐紮河南府參領胡什霸等移會巡撫進

兵報至 上切責胡什霸等曰大兵駐防河南府本爲撲滅盜賊

今永甯有警胡什霸額勒布等距賊百八十里不率兵星赴乃稱

移會巡撫遷延時日殊爲不合著胡什霸等卽率官兵進剿該撫

鎮亦卽遣兵會剿無使滋蔓仍禁戢軍士勿擾地方○戊申以郎

廷相爲福建總督

由原任河南巡撫遷

○撫遠大將軍都統大學士圖海奏

秦州樂門等處逆賊橫行振武將軍佛尼勒提督張勇王進寶等

統滿漢官兵會剿賊不能支僞將軍吳之茂於六月二十六日率

眾宵遁我兵追剿之敗賊於牡丹園復敗賊於西和縣北山斬獲

無算吳之茂僅以十餘騎越山而遁下部議敘○己酉諭兵部吉

安一郡逆賊盤踞日久小民被脅蓄髮者多此實畏死之恒情也

勞師討賊原以爲民若大兵所至將蓄髮者概行誅戮殊非朕撫

恤殘黎至意儻有據守城池山寨執持兵械抗拒不降者仍誅剿

之其餘俱著免死俾得自新爾部通行曉諭各將軍一體遵行○

以薛柱斗爲江南按察使

由直隸天津道遷

八月辛亥朔禮部左侍郎史大成以病乞假允之○甲寅撫遠大

將軍都統大學士圖海奏將軍穆占等於六月二十七日進兵樂門賊遁去追剿賊於紅崖等處恢復禮縣又慶陽僞總兵周養民王好問僞副將孔蔭熊等共率所屬文武僞官九百餘員兵丁四萬八千二百名有奇陸續投誠得旨嘉獎下部議敘○丙辰以陳鼓永爲左都御史

由吏部左侍郎遷

○己未諭定遠平寇大將軍安親王

岳樂等朕聞王恢復萍鄉大創逆賊直抵長沙甚爲嘉悅今日之事利在神速若稍遲緩俾賊得以固守則攻取不易今秦省全定蜀中來逆賊十餘萬盡已殲滅大兵卽不下四川賊亦不敢復出若分發見在陝西之兵前赴湖廣庶或有濟王其善撫百姓儻民困已極卽得地方亦復何益至叛變之人皆係脅從情非得已且原皆朕之臣子王其時加招徠卽吳三桂果有悔罪輸誠之心亦何不可容受王膺此重任自有成算特以朕意示知○江西總督

董衛國奏逆賊李蓬頭等犯餘干縣廣信營參將曹得成等擊敗之斬首八千餘級擒三百餘人又遊擊馮元常張射光等敗賊於金谿新昌等處下部議敘○庚申諭欽天監爾衙門專司天文厯法任是職者必當習學精熟向者新法舊法是非爭論今既深知新法爲是爾衙門習學天文厯法滿洲官員務令加意精勤此後習熟之人方准升用其未經學習者不准升用○壬戌 上奉

太皇太后幸湯泉○癸亥 上回宮○乙丑詔軍前將弁浮冒錢糧營私貪墨者罪之知而不舉者同坐○己巳 上御經筵○撫遠大將軍都統大學士圖海奏陝西提督原駐平涼固原與平涼密邇且爲秦省形勝之區應令王進寶移駐固原卽兼管固鎮事務其西甯爲邊陲重地距固原甚遠難於遙制固原總兵官朱衣客向在西甯熟諳形勢調駐西甯殊有裨於地方又慶陽一郡幅

員遼闊素爲賊藪富此反側初安亟需彈壓宜令隨征總兵官陳

奇謨暫鎮慶陽安輯人心從之○轉楊正中爲禮部左侍郎以杜

臻爲禮部右侍郎

由內閣學士遷

○庚午贈死事陝西神木道楊三知官

廕○裁廬州府常積庫大使缺歸知府管理裁甯國府庫儲倉大

使缺歸照磨兼理○壬申江西總督董衛國奏八月初五日官兵

敗賊於廣昌復縣城得旨嘉獎下部議敘○甲戌調丁思孔爲江

蘇布政使

由湖北調

○乙亥浙江總督李之芳奏閩逆僞將軍馬九玉

等領賊眾數萬人踞守衢州河西賊將林福等紮營大溪灘輓運

糧餉大將軍康親王傑書因詔促進兵抵衢州集都統賴塔等議

先斷賊餉道以奪其勢於是月十五日賴塔等率滿漢兵宵抵大

溪灘奮擊大敗之乘勝進取江山縣馬九玉大懼棄營遁得旨嘉

獎下部議敘○丙子諭吏部兵部撫遠大將軍都統大學士圖海

器識老成才猷練達贊襄機務宣力累朝以文武之長才兼忠愛之至性勞績茂著倚毗良殷前察哈爾布爾尼背恩反叛命圖海爲副將軍帥兵征剿運籌決勝克振軍威未及一月捷功立奏逆賊殲滅疆圉敕甯近以平涼阻兵日久屢命剿撫罔有成效特簡圖海爲大將軍統率大軍節制各路果爾謀畹深調度得宜軍鋒所至一戰克捷更能體朕好生之心宣布恩威開誠招撫遂使平涼慶陽固原等處文武官員兵民傾心向化悔罪歸誠生靈免於塗炭邊境賴以保安數日之間關隴悉定皆由籌畫周詳布置神速剿撫並用克建膚功圖海以心膂大臣膺秉鉞重寄實心爲國克副倚任朕心深爲嘉悅於軍功議敘外應從優加恩封三等公以示朕眷注忠勤酬答勳庸至意○諭兵部自逆賊煽亂以來奸徒附和侵擾地方關隴以西疆域遼闊大兵一時未集人心不

無動搖靖逆將軍侯張勇提督王進寶總兵官孫思克一聞蘭州之變卽率兵星馳渡河勦禦收復城邑條奏機宜舉發僞劄緝獲奸謀綏定邊陲厥功甚大及大兵攻取平涼專任靖逆侯張勇等鎮守秦鞏復殫心籌畫調度合宜勦禦川賊屢奏捷音紓朕西顧之憂功尤茂著伊等皆宿將重臣矢志報國同心協力展布謀猷兼以訓練士卒忠義素孚故能身先行陣所向克捷其所屬將卒亦皆效力共建功績朕甚嘉之於軍功議敘之外應從優加恩以示朕獎勵忠貞酬答勲勞至意張勇著加爲一等侯襲十次王進寶加一等阿思哈尼哈番襲八次授爲奮威將軍仍兼管平涼等處提督事務孫思克升爲一等阿達哈哈番涼州提督○轉朱德宜爲吏部左侍郎以陳一炳爲吏部右侍郎

原任山西提督

九月庚辰朔浙江總督李之芳奏聞逆僞將軍馬九玉敗走大將

軍康親王傑書遣副都統胡圖等率兵追擊破之復常山縣又遣將軍賴塔副都統馬哈達等於八月二十日進至仙霞關分路夾攻次日僞參將金應虎等獻關迎降官軍長驅而進二十三日攻拔浦城縣得旨嘉獎下部議敘○諭兵部移會康親王傑書等於仙霞關投誠僞官內擇深知閩事者一人並曾經攻克仙霞關章京一員馳驛來京○辛巳 上詣湯泉 太皇太后行宮問安○先是撫遠大將軍都統大學士公圖海奏原任廣西提督馬雄陷身從逆其母及族人俱在固原今馬雄之母欲令其孫馬承先馬承霄持書赴廣西招雄歸降 上令馬承先等馳驛來京至是抵京給以遊擊銜劄遣赴粵西招撫馬雄並令錄馬雄披陳原奏持以爲信○壬午 上回宮○湖廣總督蔡毓榮奏逆賊洪福等出犯均州駱駝嶺地方副將四十六等率兵追至芝河大殲賊眾奪

回難民並得器械甚多部議敘○癸未楊威大將軍簡親王喇布奏醴陵陷賊臣已檄署副都統楊古代等固守袁州一帶聞署副都統多諾兵駐廬州並檄催馳赴江西 上諭袁州鎮標近已增設多兵又署副都統楊古代率兵駐防兵力不少醴陵爲大將軍安親王大兵後路今旣陷賊不可不速規取著大將軍簡親王等速檄楊古代及總兵官趙應奎等率領官兵亟取醴陵並問道移會安親王發兵夾攻再檄署副都統多諾副都統席山等星夜馳赴江西聽簡親王等調度○楊威大將軍簡親王喇布奏署副都統尼滿席布總兵許貞等進取南豐僞總兵揭思進等十七員並賊兵二千餘名投誠下部議敘○甲申以陳廷敬爲內閣學士

由詹事遷

○靖逆將軍甘肅提督侯張勇奏大兵於八月初三日進取

隋州僞總兵陳友功獻城降得旨嘉獎下部議敘○丙戌 上詣

湯泉 太皇太后行宮問安○癸巳總理大兵糧餉兼理浙江地方兵馬事務戶部侍郎達都奏浦城縣石塘地方係由浙入閩之要隘耿逆令僞都尉連登雲等重兵盤踞以阻我師八月二十二日固山貝子傅喇塔令副都統倭申巴圖魯總兵官陳世凱溫處道姚啓聖等帶領滿漢官兵分路進剿連破九營殺賊甚眾直抵石塘賊寨焚毀木城獲僞關防馬匹銃礮無算本月二十四日乘勝發兵進取雲和縣得旨嘉獎下部議敘○陝西總督哈占奏商州參將拜思哈復山陽縣得旨嘉獎下部議敘○甲午予故刑部侍郎張爾素祭葬○乙未先是福建總督范承謨陷賊耿精忠多方徇誘之誓死不屈至是遇害○以徐惺爲湖北布政使

由河南按察使

遷○丁酉諭奉命大將軍康親王傑書王率領大兵大敗賊眾已入閩境耿精忠雖背恩反叛念小民遭罹賊亂困苦已極朕心深

爲惻然其以時事曉諭耿精忠速降以副朕安輯生民至意○耶陽撫治楊茂勳奏賊渠譚宏由水路來犯欲斷我師餉道得旨糧餉係大兵急需楊茂勳等宜協力攻剿速通水路仍著湖廣督撫設法陸運至耶陽接濟毋致匱乏○戊戌山西提督周卜世奏參巡撫達爾布徇庇屬員侵漁百姓得旨達爾布並本內官員俱著解任本內事情著兵部侍郎郭四海帶領司官二員前往察審○浙江總督李之芳奏賊帥馬九玉雖已敗走餘賊四竄潛匿尙多馬鵬等擁眾屯踞新建諸處地連徽饒廣信不可任其蔓延上諭大將軍康親王已統領大兵大創逆賊深入閩境應乘機掃除餘賊平定地方著大將軍簡親王副將軍希爾根江西總督董衛國將軍華善江南總督阿席熙等迅檄駐守建昌署副都統尼滿駐守徽州署副都統岳爾多等各率兵併力夾剿徽饒廣信諸郡

逆賊務期撲滅以壯浙閩大兵聲勢○庚子揚威大將軍簡親王喇布奏八月十一日副都統額赫納等進兵芝罘地方擊敗賊眾燒毀賊營二十餘座斬獲甚眾下部議敘○丙午予故刑部尚書艾元徵祭葬○先是撫遠大將軍都統大學士公圖海請暫停進取漢中之役分兵防守諸隘復遣一軍進剿湖廣 上諭圖海多選精銳率赴湖廣剿滅逆賊至是圖海奏平涼慶陽雖經底定而投誠兵心尙未甯帖漢中興安尙未恢復若帶領精兵赴楚恐不逞之徒心懷叵測得旨大將軍圖海著停其前赴湖廣署前鋒統領穆占勤勞懋著著實授都統佩征南將軍印統率陝西河南滿漢諸軍前赴湖廣見在陝西諸將俱聽穆占會同圖海揀擇或從荆南渡江或由彝陵進剿或赴岳州水陸夾攻相機行事○江西總督董衛國奏恢復金谿縣城之後逆賊楊益茂等盤踞瀘溪復

犯金谿臣標後營遊擊張射光率兵追勦斬賊千餘級守備宋國楨斬僞太子太保朱天從獲僞劄軍械無算總兵官許貞等帶領滿漢官兵分路夾擊追入瀘溪地方斬賊數千級生擒二百餘名恢復瀘溪縣得旨嘉獎下部議敘又奏瑞州營遊擊林科進勦同安等處逆賊攻破老寨追殺二十餘里陣斬僞總統都督等官十二員殺賊二千有餘獲馬匹軍器無算下部議敘○丁未奉命大將軍康親王傑書奏逆賊屯紮建陽副都統賴塔紀爾他布等於九月初三日領兵進勦擊敗賊眾克建陽縣城復追至建甯府賊俱逃遁恢復府城獲僞劄軍械無算得旨嘉獎下部議敘○戊申山西巡撫達爾布奏參山西提督周卜世挾讐起釁請遣官質審得旨這本內事情著郭四海一併察審○以石琳爲河南按察使

由湖廣即陽

○己酉郎陽撫治楊茂勳奏川賊譚宏遣賊眾潛伏

鄖江兩岸泊船琵琶灘阻絕運道九月十九日臣會同駐防鄖陽副都統李林隆提督佟國瑤等統領滿漢官兵奮勇進擊大敗賊眾運道疏通糧艘無阻得旨嘉獎下部議敘

冬十月乙卯浙江提督石調聲奏遊擊柳星等於太清縣地方擊敗賊眾擒僞官楊家益等下部議敘○戊午 上詣湯泉 太皇

太后行宮問安畢幸昌平過前明十二陵 上躬親酹酒○辛酉

上奉 太皇太后回宮○壬戌諭吏部今年淮揚等處隄岸潰

決淹沒田地關繫運道民生甚爲重大其令工部尙書龔如錫戶部侍郎伊桑阿前往省視○癸亥甯南靖寇大將軍順承郡王勒爾錦等奏九月三十日副都統塞格率領官兵追剿賊眾於鄖西地方復鄖西縣得旨嘉獎下部議敘○甲子賜荀國樑等一百四十九人武進士及第出身有差○乙丑以圖克善爲山西巡撫

政使

○浙江提督石調聲奏僞總兵張鴻翼呂聯英等三十餘員

就撫投誠救出難民六千三百八十餘丁口下部議敘○丙寅以

穆臣爲山西按察使

由部

○戊辰江西總督董衛國奏滿漢官兵

於蓮塘治坪地方敗賊斬賊渠十五名破賊營二十餘座賊犯信

豐縣遊擊賈重臣等率領官兵擊走之俱下部議敘○己巳議政

王大臣等議准禮部奏朝廷定鼎以來雖文武並用然八旗子弟

尤以武備爲急恐專心習文以致武備懈弛今值用武之際若令

八旗子弟仍與漢人一體考試必偏尙讀書有誤訓練見今已將

每佐領下子弟一名准在監肄業亦自足用除見在生員舉人進

士錄用外嗣後請將旗下子弟考試生員舉人進士暫令停止從

之○庚午鎮南將軍哈爾哈齊奏將軍舒恕等勦滅贛州附近賊

眾又發兵攻取萬安縣十月初四日擊敗逆賊恢復縣城得旨嘉

獎下部議敘○奉命大將軍康親王傑書帥師抵延平僞將軍耿繼美等以城降耿精忠聞之大懼隨遣精奇尼哈番劉蘊祥等赴延平獻僞總統將軍印續遣子耿顯祚來迎康親王師抵福州府令侍讀學士尹秦齎免死敕諭前往耿精忠於十月初四日率文武官員出城迎降獻所屬官兵冊籍尋耿精忠請隨大兵立功贖罪康親王以聞 上命耿精忠仍留靖南王爵率伊所屬官兵隨大兵征剿海逆圖功贖罪原任巡撫劉秉政等俱著來京其藩下官員及兩鎮標下武弁仍留原任兵丁照額設外其餘願效力者分隸提鎮各標願歸農者原籍安插○浙江總督李之芳奏總兵陳世凱等招撫僞參將都司等員恢復景甯遂昌慶元政和松溪等縣又温州閩郡僞官兵民人等投誠温州處州二府屬州縣並皆恢復又官兵進剿江西玉山縣恢復縣城得旨嘉獎下部議敘

○壬申征南將軍穆占奏陝西各隘撥兵防守所餘滿漢兵請令大將軍圖海及臣率赴湖廣再將荊州岳州彝陵兵內酌量揀選分路並進則吳逆可滅若欲進取漢中興安應停發陝西滿漢兵令圖海及臣率之四路進取四川雲南吳三桂勢必退保巢穴湖南地方亦易恢復 上諭陝西兵隨征各處勤勞備至運糧民多苦累若復進取四川恐征繕轉輸兵民重困故暫停漢興之役平涼雖已底定軍中缺乏馬匹新附兵丁猶未大定大將軍圖海及新附兵不便調往湖廣且荊州諸處有大將軍順承郡王勒爾錦貝勒尙善都統鄂內宜理布等統兵駐守又大將軍安親王岳樂統率大兵圍困長沙今令將軍穆占率兵抵湖廣日將荊州諸處兵每佐領配定十名又添撥蒙古兵及陝西湖廣綠旗兵隨往兵力不爲單薄著穆占仍遵前旨行迫克復地方其應設鎮守官兵

調遣機宜與各將軍總督提督等議行大將軍安親王順承郡王貝勒等深知穆占何路進兵卽相機應援又諭穆占大兵剿賊惟馬是賴爾擇可暫駐之處酌量牧養○揚威大將軍簡親王喇布奏九月二十二日夸蘭大胡理鄧庫及總兵官高登科等率領官兵於鴛鴦鋪地方擊敗賊眾斬獲無算復德興縣得旨嘉獎下部議敘○癸酉諭講官喇沙里等經書屢經講讀朕心業已熟曉通鑑一書事關前代得失甚有裨於治道作何揀擇撰擬講章進講爾等議奏○乙亥學士喇沙里等覆奏資治通鑑一書統貫諸史最爲詳備而通鑑綱目又從資治通鑑中提綱分目尤得要領擬從綱目中擇切要事實進講講章體裁首列綱次列目每條之後總括大義撰爲講說其先儒論斷可採者亦酌量附入從之

十一月己卯朔禮部衙門議覆朝鮮國王李焯奏頃陪臣使還購

買前明十六朝紀一書中載本國癸亥年廢光海君李瑅立莊穆王李倬事誣以篡逆今聞新命纂修明史特遣陪臣福善君李栢等陳奏始末伏乞刪改以昭信史查本朝纂修明史是非本乎至公該國癸亥年廢立始末及莊穆王李倬實迹自有定論並無旁採野史諸書以入正史應無庸議至外國使臣來京禁買史書今違禁購買應遣官往朝鮮國會同該王嚴加詳審議處伊所進禮物交來使帶回得旨這本內事情免遣大臣往審著國王將私買史書人犯逐一嚴拏詳審確議具奏餘依議○辛巳江南提督楊捷奏十月二十二日賊犯江浙交界乍浦地方金山營參將白可愛等馳剿大敗賊眾獲賊船隻俘斬無算下部議敘○江西總督董衛國奏建昌縣受安地方賊勢猖獗臣檄南康府知府倫品卓率兵剿撫擒僞官七員陸續招撫僞官一百二十員兵五千餘人

下部議敘○癸未予陝西死事副將陳達世職○丙戌奉命大將軍康親王傑書奏海賊鄭錦遣僞總統許耀率兵三萬餘直徧福州至烏龍江之南小門山真鳳山等處結寨連營臣遣參贊軍務都統喇哈達等率滿漢官兵分爲三隊於十月十五日渡江奮擊前後夾攻大敗賊眾克取賊營追奔四十餘里斬殺甚多生擒僞總兵副將以下三十三員下部議敘○諭湖廣大將軍王貝勒參贊大臣及官兵等我朝勦業以來戰勝攻取動合兵機將帥皆身先士卒無不立奏膚功逆賊吳三桂背恩反叛朕念爾等宗室大臣簡閱官兵委以南征削平僭亂拯救生民今出師三年未獲尺寸坐失機會使疆圉日偏賊勢鴟張糜餉困民誤國孰甚罪在王貝勒將軍大臣於眾官兵無與今陝西福建江西浙江雖漸次底定然賊渠吳三桂不誅於事何濟日者穆占在川陝時勞績茂著

茲特簡爲征南將軍命以討賊爾等亦當同心勦力殲寇拓疆以副朕靖亂安民之意慎勿妄分疆界各顧部伍互相推諉仍蹈前失也眾官兵自發遣後爲國效力暑雨蒸溼浹壕築壘晝夜枕戈披堅冒刃分防偵探備極勞苦朕悉知之每念及此深用惻然爾眾官兵其念朕卹養之恩益加用命儻樹立功勛朕不吝優加獎賞其各勉之○以穆爾賽爲山西布政使

由郎中遷

○辛卯浙江總督

李之芳奏僞總兵馮公輔擁眾數千屯聚處州山谷臣奏諭招撫馮公輔傾心向化率所部僞副將以下官二百二十餘員兵三千四百餘名投誠下部議敘又奏臣標參將蔣懋勛等全旅來歸下部議敘○丙申先是定遠平寇大將軍安親王岳樂赴長沙上以我軍深入逆賊吳三桂必往來救援屢敕荆岳大將軍順承郡王勒爾錦貝勒尙善等揚聲進兵以牽其勢不時偵探若賊有可

乘之機則渡江進取至是總督董衛國巡撫韓世琦總兵官趙應奎等相繼疏言吳三桂知長沙被圍卽遣馬寶高啟隆等由岳州星馳救應又遣僞將軍胡國柱等入長沙固守吳三桂亦自松滋擁眾來援屯兵嶽麓山上諭荆岳大將軍等爾等故違指授遲延時日以致逆賊得間四出應援今岳州之兵安處日久馬皆肥壯著將軍穆占速赴湖廣簡選荆岳彝陵士馬由岳州趨長沙接應安親王兵若長沙無虞或出彝陵或取岳州或由荊州渡江便宜進發○以姚啟聖爲福建布政使由浙江溫處道遷吳興祚爲福建按察使由江南無錫知縣遷○兵部督捕侍郎郭四海等奏臣奉命察審山西提督周卜世參巡撫達爾布徇庇屬員侵漁百姓各款並巡撫達爾布覆參周卜世挾仇起釁一案歷經審訊除事在赦前者不議外達爾布係封疆大臣不能釐剔利弊反煩擾百姓違禁建立生

祠並誣陷良民張維祥捏款濫責必欲置之死地應革職杖流周
十世以風聞之言借端訐參報復私仇亦應革職至按察司賽音
達禮陽曲知縣邢振岳受上司指使誣拏良民遇赦之事不行援
赦賽音達禮應降四級調用邢振岳應革職下吏兵刑三部議奏
尋部議周十世邢振岳俱免革職餘照原議得旨達爾布著革職
周十世免革職按察司係通省刑名之官賽音達禮將良民張維
祥誣拏濫責兩遇恩赦不行宥免必欲置之死地情罪可惡賽音
達禮亦著革職餘依議○以故翰林院編修史鶴齡久侍講幄素
著勤勞特賜祭一次○江西總督董衛國奏副都統莽依圖率領
滿漢官兵敗賊於信豐縣又撫標遊擊楊以松敗賊於定南縣復
縣城南贛副將許盛敗賊於破塘口復泰和縣南贛總兵官哲爾
肯敗賊於九渡水等處擒斬僞總兵僞副將等員得旨嘉獎下部

議敘○丁酉以順天府遵化縣昌瑞山建世祖章皇帝孝陵升

縣爲州改設知州州判吏目學正訓導各一○江西總督董衛國

奏南贛總兵官哲爾肯參將宣成功率兵敗賊於南康縣之復潭

鋪斬首千餘級○己亥揚威大將軍簡親王喇布奏逆賊楊彪萬

勝竊踞萬年縣肆行刦掠十月初五日遣夸蘭大吳達禪遊擊陳

其善等率兵相機堵剿自初六日至十二日屢敗賊眾於五都馮

家山等處陣斬無算賊首齊瓜郎窮蹙奔遁義陽大山生擒僞都

司等官招撫僞官一百三十餘員兵丁九千五百餘名救出難民

二萬餘口下部議敘○辛丑上幸南苑行圍○以嚴冬敕法司

速結正刑獄○予故江甯巡撫馬祐祭葬加祭二次諡清恪○壬

寅免江南山陽等七州縣本年分河決水災額賦十之三○先是

上諭將軍哈爾哈齊額楚等已抵吉安數月不能剿除逆賊攻

克城池故逆賊乘間陷醴陵窺萍鄉恣意肆行覲斷安親王大兵後路及提督趙賴等領兵赴援又不併力勦賊徒擁重兵謁時玩日且屢檄簡親王喇布副將軍希爾根令其親統大兵速赴吉安乃藉口南昌重地逗遛不前遲久始發又不多備火藥等物卽此觀之貽誤軍機非小喇布等可速取吉安應援醴陵等處至是簡親王喇布等奏江西省城及撫州樂平諸要地汛兵單弱總督董衛國又奏上高奉新諸縣賊氛蜂起請速遣援師並調鄰省兵前來防守 上諭各路調集江西兵爲數不少簡親王喇布等不速取吉安徒爾勞師糜餉吉安一郡尙不能取湖南逆賊何日得平前理藩院郎中胡什巴所領蒙古兵已遣發江西董衛國又身在全省城鄰省之兵無庸調遣至恢復長沙平定湖南全賴吉安大兵接應簡親王等若仍遷延觀望安親王大兵脫有疏虞喇布等當

以失機例從重治罪不貸○戊申 上還宮

十二月庚戌命淮揚沿河植柳以備工需○壬子奉命大將軍康親王傑書奏臣帥大兵平定閩疆諸凡諮謀軍務及分兵留守事宜不得不請增參贊之臣伏乞 皇上遣在京大臣二三人前來參贊又靖南王耿精忠見隨大兵征剿其福州府屬下官兵家口統轄乏人額駙耿昭忠耿聚忠乞遣一人同大兵鎮守 上命左都御史介山兵部左侍郎吳努春參贊康親王軍務以耿昭忠爲鎮平將軍駐守福州○癸丑江西巡撫佟國楨奏廣東從逆提督嚴自明總兵張星耀郭義等統領賊眾偏南康臣與將軍舒恕總兵哲爾肯發兵進剿斬賊萬餘級破賊營十七所獲偽印劄軍器火藥不可勝計賊敗遁南安下部議敘○授福建巡撫楊熙爲拜他喇布勒哈番又一拖沙喇哈番總兵官拜音達禮爲一等阿達

哈哈番以進征粵省時值尙之信叛楊熙等各率所部兵奪門而出也○揚威大將軍簡親王喇布奏將軍額赫納率兵赴援粵東至清遠縣適值尙逆遣人齎書招清遠縣知縣白啟明堅拒不從執其來使並偽書三百解送將軍額赫納軍前棄其妻子隨大軍回至贛州應請議敘以示鼓勵得旨知縣白啟明將逆書及來使一併出首棄其妻子隨大兵而同忠貞深爲可嘉著從優議敘吏部議覆白啟明應授爲知府令留江西遇有缺出該督撫卽行題補從之○丙辰揚威大將軍簡親王喇布奏偽將軍耿繼善等率賊數萬圍困南豐海寇侵犯廣昌得旨前大將軍康親王傑書奏報耿精忠及閩省叛兵俱已歸降廣信諸處亦皆嚮化偽將軍等盡已調回今江西南豐諸處耿繼善等何故仍行騷擾著康親王傑書耿精忠察實奏聞大兵抵福州日久若不急剿海寇則江西

之賊勢難遽靖王等卽進兵平定興泉漳諸郡或應從汀州分兵
夾攻俱著相機進發○丁巳尙之信遣人齎密奏至揚威大將軍
簡親王喇布軍前乞降喇布以聞 上敕諭尙之信曰昔 太祖
高皇帝肇造鴻業爾父航海歸誠功猷茂著後命駐防粵省平定
海疆自吳逆叛亂以來益矢忠藎屢建功勳故特封爾父爲親王
授爾爲討寇將軍正期克奮勇畧埽除逆賊不圖粵省變亂道路
梗阻今覽爾密奏稱父子世受國恩斷不敢懷異念願立功贖罪
來迎大師朕知爾父子不忘報國念篤忠貞因事出倉卒致成變
異朕心深爲憫惻今特降旨將爾已往之罪並爾屬下官兵概行
赦免儻能相機剿賊立功自效仍加恩優敘爾等益竭悃誠勉圖
後效以副朕始終曲全至意○戊午撫遠大將軍都統大學士公
圖海奏平涼慶陽雖已底定漢中興安尙爲賊據臣等議於來春

進討應先調綠旗官兵檄提督孫思克量留兵守涼州親統官軍
來秦州將軍侯張勇遣兵二千亦赴秦州提督趙良棟量留兵守
甯夏親統官軍來鳳翔將軍王進寶遣兵二千亦赴鳳翔俱於明
年正月二十日內齊集所約之地得旨調兵征勦事關重大令副
都統吳丹員外郎馬爾漢等速赴張勇王進寶孫思克趙良棟等
軍前調遣綠旗官兵或如大將軍公圖海所請或作何調遣將軍
提督等誰宜親往作何前進至恢復漢中興安時或駐守其地或
徑取四川逐一公同確議遣同往章京馳驛奏聞○己未鎮南將
軍吏部侍郎覺羅舒恕奏黃芳世自粵東至南豐言逆賊孫延齡
已被吳三桂擒戮籍其家產以所屬兵付綏國安統轄得旨馬雄
屢請援師因不卽至勢迫從賊綏國安爲孫延齡倡叛伊等皆受
國厚恩大將軍簡親王喇布等公同確議遣人招撫○庚申諭兵

部海澄公黃芳世矢報國恩不肯從逆間關冒險全節來歸忠貞
茂著著加太子太保鎮守漳州黃藍屢次齎奏忠勤可嘉著優擢
爲都督僉事充海澄總兵官並令馳驛赴大將軍康親王軍俟漳
泉恢復收集海澄公標下散失官兵鎮守汛地○撫遠大將軍都
統大學士公圖海奏建威將軍吳丹等遣發官兵勦撫華州商州
等處賊眾屢立戰功下部議敘又報鎮守商州副都統穆舒渾等
擊敗峻嶺川逆賊復山陽縣得旨嘉獎下部議敘○乙丑奉命大
將軍康親王傑書等奏報僞將軍黃朝用帶領僞官桑明等一百
十員兵一千五百餘名投誠並獻廣信府城僞將軍黃高帶領僞
官丁夏等七十七員兵一千餘名投誠僞親軍侯都尉白顯忠帶
領僞總兵楊全等八員兵一千餘名投誠又總兵官劉德茂等招
撫僞將軍徐子旺提督段應舉等招撫將軍馬升等僞員俱下部

議敘○揚威大將軍簡親王喇布奏十一月二十日逆賊耿繼善
委偽將軍李懋珠等統領賊兵三萬攻偏南豐縣署副都統雅秦
總兵官許貞率兵進剿大破之毀賊營十餘所斬偽總兵王大耀
等及賊兵四千餘級生擒二百餘名獲火礮軍器不可勝計下部
議敘又奏逆賊吳三桂下偽都督郭應福等領兵二萬屯泰和之
蘆源洞署副都統多諾等率滿漢官兵擊之追奔十五里擒斬甚
多焚其營壘下部議敘○丙寅江西總督董衛國奏總兵官許貞
等奉委招撫陸續招到逆賊朱銃錫下偽官共五十四員僞兵一
萬三千餘人下部議敘○戊辰江西總督董衛國奏遊擊許鳳等
敗賊於蓮堂南瑞道李世昌等敗賊於白茅衝斬獲甚眾毀賊營
五座下部議敘又奏逆賊朱銃錫受耿精忠敕遠將軍僞印盤踞
貴溪自稱宜春藩名色前擒伊弟朱四朱銃錫遁走臣差官招撫

怙終不悛隨調遊擊佟國棟等率兵進剿斬殺甚眾奪獲三關朱
銃鋤逃入江潯山見在搜捕務盡根株下部議敘○己巳揚威大
將軍簡親王喇布等奏賊眾數萬來援吉安距城二十里許江西
總督董衛國亦奏逆賊自涿口抵攸縣界聲言犯萍鄉又言往援
吉安聞賊帥馬寶等率賊三四萬已至永新安福並欲爲吉安救
援得旨逆賊吳三桂知我荆岳大將軍等斷不能進兵故身往調
集賊眾併力於長沙吉安將軍穆占速選荊州士馬相機前進以
分長沙吉安賊勢平定湖南大將軍簡親王喇布等嚴飭所部保
固疆圉○辛未奉命大將軍康親王傑書奏耿精忠下除編作佐
領兵丁外又有左右兩鎮兵今福建經制兵及撫標兵俱照原額
全設耿精忠見率伊佐領下兵隨大兵征剿海寇未爲不足當節
省餉銀之際其兩鎮官兵應請裁革又藩下總兵官曾養性及原

任温州總兵官祖宏動俱自温州率兵至福州祖宏動應照劉秉政例赴京候補得旨康親王身在地方稔悉情形所請裁兩鎮官兵俱如所奏其裁退兵丁設法安插務必得所祖宏動著令來京○浙江總督李之芳奏僞總兵馬鵬於諸寇中最稱梟惡屢招不從聚眾陳村又勾引德興縣賊眾復至白沙關外紮營臣密飭副將武榮參將蔣紹勛等提兵進剿先後破賊十九寨生擒馬鵬斬之下部議敘○癸酉吏部議覆左都御史陳鼐奏自吳逆倡亂以來陷賊之員偷生者多盡節者少因而展轉煽惑所在脅從近者三秦八閩先後底定皇上軫念一時遭受迫脅之人特沛洪恩許以投誠免罪此誠如天之仁古來未有之異數也伏思投誠者既加寬宥以開自新之途則死節者亟宜表揚以勵忠義之氣以臣所聞被亂地方職官亦有矢死不從捐軀殉難甚或全家盡

節慘烈異常如福建巡海道陳啟泰浙江溫處道陳丹赤尤爲彰著今各地方或已經全平或次第恢復而忠臣烈士尙未表揚懇祈 皇上敕該督撫卽行察訪被亂地方凡有盡忠死難文武大小官員如陳啟泰等者將姓名事蹟速行題報仰請從優褒卹俾死事者雖身遭慘變而名垂不朽錄及後人凡屬臣子知死榮於生感奮效法皆願抗賊以全忠必不偷生以負國則逆勢旣孤蕩平立奏應如所請敕下浙江福建陝西江西各省督撫提鎮將盡忠殉難文武官員姓名事蹟逐一查明具題議卹從之○丙子奉命大將軍康親王傑書奏臣前遣人招撫耿繼善尙未至彼地耿繼善聞大兵將至卽棄邵武府遁往江西海逆下僞將軍吳淑乘勢取邵武城復犯延平伊弟僞總兵吳潛率兵渡河屯浦塘迎敵副都統伯穆赫林等率滿漢官兵屢次擊敗之陣斬僞總兵楊大

任等殺賊兵萬餘生擒僞總兵阮信等三百四十餘人所獲軍器
無算僞武定將軍彭世勳以邵武府降得旨嘉獎下部議敘○是
月免江西東鄉縣旱災陝西涇州雹災田租○是歲朝鮮來貢○
人丁戶口一千六百三萬七千二百六十八田地山蕩畦地四百
八十六萬四千二百三十三頃九十二畝徵銀二千二十一萬二
千八百三十八兩五錢有奇米豆麥五百三萬六千三百八石九
斗有奇草二百二十五萬三千八十七束茶十五萬三千七百三
十五引行鹽三百五十六萬五千四百二十三引徵課銀二百二
十五萬九百七十二兩三錢有奇鑄錢二萬三千一百三十六萬
五千三百六十有奇

東華錄

康熙十九

臣王先謙敬編

臣周澗蕃恭校

康熙十六年丁巳春正月辛巳 上謁 孝陵啟鑒○壬午 上

至 孝陵素服率官員行禮舉哀○甲申 世祖章皇帝忌辰

上詣 孝陵致祭○乙酉回鑾○丁亥 上還京師○戊子揚威

大將軍簡親王喇布奏十二月初四日副都統席布遣發官兵屢

敗逆賊嚴君寵於浮梁縣地方招撫偽總兵郭秀等四百餘員賊

兵二萬九千餘名恢復縣城得旨嘉獎下部議敘○江西總督董

衛國奏粵逆圍信豐縣於通贛要路堅立木柵斷絕我兵歸路副

將周球等親統官兵奮勇衝殺斬賊兵千餘其溺水死被生擒者

甚眾下部議敘○江西巡撫佟國楨奏楚粵諸逆前偏南康縣滿

洲大兵與撫鎮兩標將士會同進剿諸賊悉潰餘逆嚴自明等退踞南安十二月十一日副將許盛統兵進剿殺賊二千有餘恢復南安之上猶縣又贛縣田村地方招降僞總兵劉永祺等五員萬安縣黃塘地方招降僞總兵張輝等十員兵丁六千七百餘名得旨嘉獎下部議敘○己丑甯南靖寇大將軍順承郡王勒爾錦奏將軍穆占抵荊州增撥在荊都統伯宜理布前鋒統領碩岱副都統托岱龔圖漢軍副都統祖澤純宜思孝及滿洲漢軍邊外蒙古綠旗官兵共六千餘率赴岳州長沙如賊覘知荊州大兵勢分乘虛侵犯我兵守汛尙恐力單他處有警實難應援乞調鄰近滿洲綠旗官兵移駐荊州以資防守 上諭駐河南府滿洲漢軍蒙古兵令員外郎頗羅塞統領其自陝西遣發滿洲漢軍兵令原轄將弁統領俱赴荊州又命鎮東將軍布顏暫駐懷慶○庚寅撫遠大

將軍都統大學士圖海奏臣等前調綠旗官兵本擬於二月內進取漢中興安今將軍侯張勇等咨稱宜視夏秋收穫豐歉再圖進取但漢中興安山峻路險延至彼時適遇霖潦賊守益堅臣等仍欲調兵及時進取得旨大兵卽克復漢中興安須設重兵重兵一設則運餉維艱若俟夏秋進取又頓兵曠日虛糜糧糗今將軍穆占方勦吳逆機不可失大將軍公圖海等暫停漢興之役留滿洲蒙古兵一萬同綠旗兵防守秦州諸隘分兵五千遣大臣一人統赴荊州到日順承郡王等量留官兵防守荊州彝陵諸處乘穆占由岳州長沙進取湖南之時相機渡江破賊○丙申揚威大將軍簡親王喇布奏賊援吉安將軍額楚等率兵迎戰三次失利臣等議調南昌建昌諸處滿漢官兵俟到日協力攻勦奏入下議政王大臣等議尋議 國家開勦以來賞罰嚴明攻城野戰無不克捷

今額楚等官兵屢敗皆由將懦兵玩大將軍簡親王喇布等應嚴加處分但見在勦賊俟事平日再議其臨陣先退者卽行拘禁嗣後犯者勿論官員兵丁卽於軍前正法將弁等有觀望不前者削職仍隨大將軍效力喇布旣稱調取建昌諸處官兵到日卽宜整頓兵馬勦絕賊援攻拔吉安將軍穆占已於本月十一日抵岳亦應速令相度機宜或攻取岳州或進勦長沙以分賊勢奏入報可仍令戶部侍郎班迪等赴吉安嚴察罪狀以聞○己亥諭刑部律內設方術誘取良人與略賣良人子女者罪止論戍爲妻妾子孫者罪止論徒皆不至於死是以犯者頗多且其惡甚於牙販而法輕不足蔽辜著詳議以聞尋議嗣後凡犯誘取典賣或爲妻妾等事不分所誘良賤已賣未賣爲首者立絞爲從者係旗人枷責係民人杖流如止一人卽以爲首論被誘之人和同者俱如爲從之

罪非和同者不坐不知情而典賣者免罪追償給還其以藥物等
項誘取者俱如略誘人例治罪從之○庚子揚威大將軍簡親王
喇布奏來援吉安賊眾於本月初九日夜遁得旨我兵屢戰不利
賊何故遁或因將軍穆占進兵長沙聞風掣回或謀潛襲袁州俱
不可料今吉安已調建昌諸處官兵簡親王喇布等宜乘機速行
攻取吉安至於袁州所繫甚大宜分兵固守勿致疏虞總督董衛
國其檄令總兵官趙應奎協力防禦○征南將軍穆占奏臣等率
兵於正月二十二日由岳州赴長沙深入賊境岳州百里境內宜
發兵千名防守庶無斷後之虞 上以穆占進剿湖南既精選荆
岳之兵率之前發餘兵單薄難以分駐不允所請尋尙善等亦奏
言兵單不便分發 上命尙善等作水陸攻戰之勢乘隙進取仍
時探穆占兵消息以聞○壬寅以覺羅沙賴爲盛京工部侍郎內

閣學士遷

○征南將軍穆占奏臣抵岳州相度形勢江湖之間非船不

濟今安徽巡撫造送沙船四十艘於本月十五日到岳應再發江南荊州諸處沙船百餘艘齊赴岳州軍前備長沙未能卽克至三四月間臣等遣兵取船由洞庭前進或攻或圍均有攸賴若長沙旣得則安親王及臣等之兵卽乘此船水陸夾攻岳州庶乎有濟

上命京口將軍王之鼎發沙唬船六十艘隨帶礮械水手人役量配官兵護送至岳州並靳輔所送船足百艘之數以備安親王岳樂將軍穆占取用○甲辰奉命大將軍康親王傑書奏副都統伯穆赫林等率領官兵追剿海賊恢復泰甯建甯甯化長汀清流歸化連城七縣及汀州府城招降僞官七十三員兵丁二千五百餘名得旨嘉獎下部議敘○丁未以項景襄爲內閣學士

由詹事遷

○

免湖北襄陽宜城等縣去年水災賦

二月戊申朔江西總督董衛國奏僞總兵王霖踞守新城正月十

九日總兵官許貞等統兵進剿恢復縣城招降僞副將劉相等二

十五名得旨嘉獎下部議敘○辛亥以薩穆哈爲內閣學士由太僕寺

卿○予浙江陣歿將弁張秉乾潘上吉吳泗范漢臣等廕卹○癸

丑江西巡撫佟國楨奏正月初十日副將周球等率官兵大破海

逆於五里排復會昌縣招降僞總兵楊夢月等得旨嘉獎下部議

敘○乙卯定遠平寇大將軍安親王岳樂奏副都統阿晉泰等率

領滿漢官兵於瀏陽縣擊敗僞總兵解先聲斬首一千餘級生擒

僞遊擊守備等九名下部議敘○丙辰九卿議覆差往驗勘河工

工部尚書翼如錫等奏河臣王光裕會奏高郵三淺西隄一處偏

近清水潭俟水涸另議興修其餘各工已經相機搶築今看各口

尙未興工詢其何故則以錢糧不足爲辭又奏瞿家壩修築之處

亦未築成以致隄岸屢決地方淹沒又題高郵城南決口三十處
堵塞完固今查新隄高寬不及舊隄之半王光裕全無治河之才
以致河工潰壞請另簡賢能庶於河道有益應將王光裕革職得
旨王光裕著解總河任遣吏部侍郎折爾肯副都御史金儁前往
會同新任總河察審九卿又議冀如錫等奏河道水性靡常全賴
隄工捍禦今須亟行修築黃河南岸自白洋河至雲梯關北岸自
清河縣至雲梯關及高家堰周家橋翟家壩古溝諸決口其餘潰
壞單薄之隄俱宜修築堅固其清口一帶沙淤及運河見受黃流
淤澱之處亦應疏濬又自淮至揚兩岸土石隄工清水潭等處決
口並宜卽時堵築至歸仁隄石工原有估計錢糧至今尙未修完
仍嚴令該管河官速行堵塞其未經估計土隄之口亦應一併興
修查黃運兩河關係運道民生自應修治但所費浩繁一時難以

並舉應令新任河臣酌量緊要處先行修築其歸仁隄未完工程亦速令催完從之○己未 上幸南苑行圍○辛酉諭戶部閩地經海孽擾害又遭逆賊暴征橫斂民困已極今年錢糧盡與蠲免其遭亂竄避人民俱招徠還籍俾各安本業○予故內閣學士穆誠額祭葬○添設岳州水師營總兵官以平魯路參將萬正色充之其標下添設遊擊守備各二千總四把總八撥撫提標兵各五百名及岳州城守原額兵七百名增募兵三百名合二千名爲經制○壬戌奉命大將軍康親王傑書奏副都統伯穆赫林等遣兵恢復福建上杭武平永定及江西瑞金等縣招降僞總兵尹雲龍曾顯洪張威及僞副將知縣等官二百十九名贛州一路俱平得旨嘉獎下部議敘○癸亥浙江總督李之芳奏周公源口通衢州處州兩府屬縣地聯江西福建爲三省交界之處閩逆林惟仁統

眾盤踞參將王英等奮力踰險直搗賊巢林惟仁率眾歸順下部
議敘○甲子大閱於南苑○乙丑 上回宮○丙寅先是安遠靖
寇大將軍貝勒尙善等奏今備船百艘遣赴長沙乞添發近地甲
兵每佐領四名以壯兵力先破賊船後遣我船進發得旨將軍穆
占兵於本月初三日已抵長沙賊勢必分順承郡王勒爾錦等宜
乘此機會陝西兵一到卽行渡江儻渡江未便則如貝勒尙善所
請分兵赴岳州其或分兵發往或渡江前進速議以聞至尙善等
前稱造挨牌車輛攻取岳州繼稱水陸齊進乃觀望不前其爲誑
奏明甚今據報岳州賊較前大減添發官兵便可進取若荊州發
兵到日卽宜速取儻仍遷延時日併前罪嚴行議處尋勒爾錦又
請發河南江南綠旗官兵 上不許令遵前旨速議具奏至是勒
爾錦等兩議以聞一議俟陝兵到荊更得綠旗官兵仍行渡江一

議俟陝兵遣發及所請緣旗兵到正值水發之時過江不能無阻
今宜於每佐領四名外再量行添發酌撥船艘遣赴岳州其間若
有機會可乘亦卽酌量而行 上諭今正勦滅吳逆時不可緩宜
自岳州水路夾攻勒爾錦等可於每佐領下簡精兵五名量配船
艘令都統鄂內佩討逆將軍印率赴岳州速行夾勦○浙江總督
李之芳奏江西饒廣二府所屬鉛山與安弋陽貴溪等處盡爲賊
踞以致道路不通遣遊擊郭守金等隨勦隨撫恢復鉛山縣城興
安弋陽貴溪三縣百姓踊躍歸命得旨嘉獎下部議敘○丁卯
皇子允祉生○奉命大將軍康親王傑書奏甯海將軍喇哈達平
南將軍賴塔等率領大兵進勦興化正月二十六日連破二十六
營陣斬僞總督趙得勝僞總兵副將等六十二員恢復興化府城
防守仙遊縣僞總兵郭維藩率眾投誠得旨嘉獎下部議敘○遣

刑部郎中色度等至岳州勞問將軍大臣滿漢官兵並宣諭云岳州長沙勢如雨足此蹶則彼不能獨立我國家禁旅徂征戰勝攻克未有如此之相持曠日者也若都統用命於貝勒貝子將弁用命於都統兵卒用命於將弁以次爭先指臂相效何功不成陝西官兵勦力成功今並獲休息諸將士儻能奮勇奏效亦與彼同獎賚官秩朕所不靳其戰守機宜令貝勒貝子會同定議奏聞未幾安遠靖寇大將軍貝勒尙善等奏郎中色度到岳州傳奏諭旨集議水陸攻取岳州可否情形臣等議今者賊有可破機會正宜水陸夾攻但陸路賊備甚嚴應令舟師先發陸兵繼進茲分撥已定俟戰船所用器械整頓完備臣卽親統進剿從之○己巳諭兵部進蜀官兵並未平定地方大創賊寇且屢奉溫綸理宜勦力疆場乃至西安布匿名札惑眾旣抵隴州又妄行控告不赴平涼我國

家勦業以來從未有此行事統兵將領不能約束兵丁肆行不法及至京師敕令首舉倡告之人官兵又互相隱匿不舉殊干法紀此行軍功俱不准議敘尋議政王大臣等奏據都統赫業等取到供狀及將軍穆占咨文西安將軍佛尼勒供詞則官軍棄營敗遁是實宜將左翼四旗並陣亡署護軍統領喀錫泰部下官兵俱行拏問得旨保甯蟠龍山軍營被衝官兵敗遁之處取供含糊其地方又未質對真實且官兵行役勞苦免其究問至署護軍統領喀錫泰陣亡所部官兵棄將領而逃其未受傷官兵俱著拏問○庚午吏部侍郎覺羅舒恕奏吳逆下僞總兵關世榮副將周德先等率僞官五十一員兵丁家口一萬餘名來至贛州軍前投誠下部知之○江西巡撫佟國楨奏海逆僞總兵賴鼎球等率僞官七十員兵一萬餘名投誠下部知之○辛未以靳輔爲河道總督

徵選撫選○子故福建總督郎廷佐祭葬○癸酉諭議政王大臣等鄂

爾多斯固山貝子達爾扎聞定邊花馬池諸處變叛不待命遣卽
親率官兵招撫城堡擒獲賊渠深爲可嘉其進封爲多羅貝勒○
贈鞏昌殉難同知王扎官廕○甲戌諭議政王大臣等鄂爾多斯
多羅貝勒索諾慕爲國效力齋奏人員應付驛馬不致有誤且提
督陳福請兵不待命遣卽令伊子弟馳赴深爲可嘉其進封爲多
羅郡王○諭議政王大臣等多羅貝勒董額等統率大兵出征秦
中並未能克復疆土撫安百姓貽誤軍機殊負委託可削去董額
多羅貝勒罷議政爲閒散宗室降固山貝子溫齊爲輔國公革去
都統及宗人府右宗人輔國公綽克託罷宗人府右宗人仍罰俸

二年○乙亥 上御經筵

三月戊寅傅宏烈遣吏部侍郎覺羅舒恕書曰孔王女孔四貞曾

向宏烈言無刻不以 太皇太后爲念若降恩綸赦孫延齡罪封孔四貞爲郡主則可以成事舒恕以聞 上諭兵部鈔錄舒恕奏疏並傳宏烈移文發督捕理事官麻勒吉俾招撫孔四貞○己卯奉命大將軍康親王傑書奏二月初九日甯海將軍喇哈達等統領大兵攻克泉州府海賊潰遁陣斬僞虎衛將軍許耀僞總兵六員僞副將三十一員安撫所屬各縣難民俱令復業得旨嘉獎下部議敘○揚威大將軍簡親王喇布奏袁臨總兵官趙應奎及署夸蘭大張世薦特爾赫等自袁州分路進剿敗賊於石塘等處下部議敘○庚辰奉命大將軍康親王傑書奏海賊鄭錦大敗於興化泉州遂爾喪膽棄漳州海澄而遁海澄僞副將孫紹芳漳州僞知府程夢蘭等相繼於軍前納款甯海將軍喇哈達等統率大兵於二月二十日抵漳州遂復府城及海澄等十縣閩地悉平得旨

王統官兵自衢州入仙霞關直抵福州勦撫並用所向克捷擊逐海賊收復全閩安輯百姓克奏膚功深爲可嘉有功人員著議敘具奏○甲申諭議政王大臣等今閩地悉定大將軍安親王圍困長沙已久將軍穆占復帥師進勦將軍鄂內統兵水陸赴岳殲滅吳逆蕩平諸寇在此一舉康親王宜及兵威大振之時分遣官兵同耿精忠兵進取潮州其進勦留守機宜速議以聞又大兵分路進擊逆賊不暇窺顧其授署副都統莽依圖爲鎮南將軍精簡士馬夾攻廣東以副都統額赫納署副都統穆承格參贊軍務令侍郎舒恕量留甲兵同巡撫佟國楨總兵官哲爾肯鎮守贛州諸處至江西建昌諸路大兵俱已撤赴吉安簡親王軍士卒甚眾酌撥每佐領兵三名合在贛大兵令莽依圖共選每佐領六七名俟康親王所議俞旨到贛卽率之前進尋尙之信傳宏烈密奏納款劉

進忠苗之秀各報投誠 上以尙之信等原奏鈔發康親王傑書等令速進廣東未幾奉命大將軍康親王傑書奏福建旣平卽欲親統大兵入粵但省會重地未可輕離且自福至漳相距甚遠兵馬到彼必須休息恐遲至炎暑難以進師今漳汀駐守大兵密邇粵境宜選將士有馬者令將軍喇哈達都統賴塔等率之同耿精忠先赴潮州後當遣兵接應 上報可復諭議政王大臣等康親王大兵平閩人馬勞頓難以深入粵地令酌分官兵前赴潮州若劉進忠等迎降暫駐彼地卽移檄尙之信知之仍趣莽依圖兵速進廣東○諭兵部前原任將軍赫業瓦爾喀等於蟠龍山爲賊衝營一案並未審明口供確驗地方造具清冊冀圖蒙混今大將軍簡親王喇布等又將吉安軍情不行嚴審取供殊屬不合我國家軍法嚴明從無苟且怠玩之弊嗣後各將軍應查明官軍功罪確

驗地方取供造冊以便稽覈若仍蹈襲故轍將統兵將軍等俟事

平日嚴加治罪○戊子以徐國相爲安徽巡撫

由布政使遷

○己丑諭

禮部帝王克謹天戒凡有垂象皆關治理故設立專官職司占候所繫甚重一切祥異理應詳加推測不時具奏今欽天監於尋常節氣尙有觀驗至今歲三月霜霧及以前星辰陵犯等項應行占奏者並未奏聞皆由該監官員蒙昧疏忽有負職掌爾部卽行察議具奏尋禮部議治理厯法南懷仁等疏忽溺職應交吏部議處上寬免之○庚寅諭翰林院掌院學士喇沙里等治道首崇儒雅前有旨令翰林官將所作詩賦詞章及眞行草書不時進呈後因吳逆反叛軍事倥偬遂未進呈今四方漸定正宜振興文教翰林官有長於詞賦及書法佳者令繕寫陸續進呈○議政王大臣等會推正紅旗蒙古副都統員缺得旨大兵進剿四川保甯逆賊

來犯營盤佐領穆舒誓死決戰將甲上記號付與將軍遂率領官兵進戰擊敗逆賊深爲可嘉著從優升補副都統○乙未翰林院掌院學士喇沙里進呈翰院官詩文 上召至懋勤殿親自披閱命喇沙里書漢字呈覽以 御臨蘇軾楷書手卷一軸賜之○尙之信傳宏烈各遣人密奏請兵 上諭大將軍安親王圍困長沙已久將軍穆占復進定湖南將軍鄂內又赴岳州水陸夾攻逆賊吳三桂無暇窺粵且大將軍康親王令將軍喇哈達統兵下潮州將軍莽依圖等亦率兵入粵尙之信傳宏烈其各率所部速迎王師協剿兇逆○原任潮州總兵官劉進忠碣石總兵官苗之秀遣人投誠奉命大將軍康親王傑書以聞 上命宥劉進忠苗之秀及標下官兵罪仍以劉進忠爲潮州總兵官苗之秀爲碣石總兵官隨大兵進剿尋授劉進忠爲征逆將軍○己亥江西總督董衛

國奏逆賊楊玉泰等竊踞宜黃樂安崇仁山谷中荼毒生民若不
早爲剪除勢必滋蔓請親統標兵前往撲滅 上從之未幾董衛
國奏臣偕副都統尼滿提督趙賴總兵官許貞等率兵分剿敗賊
於大嶺遂復樂安楊玉泰窮蹙率眾來降得旨嘉獎下部議敘○
辛丑揚威大將軍簡親王喇布奏署副都統尼滿等招撫南豐廣
昌等處僞將軍劉如桂等並繳僞印劄付關防下部議敘○壬寅
皇子長生薨○戶部侍郎班迪等還自吉安以所察軍情奏聞
得旨大將軍簡親王喇布自至江西初無勞績圍困吉安日久未
下賊遁久不邀擊其令戴罪圖功參贊哈爾哈齊巴爾堪等營壘
失守情罪重大俱革職披甲自效副將軍希爾根年老衰憊著撤
回南昌暫駐將軍額楚臨陣指揮不舉發首遁之人明係身先敗
北欲掩己罪著削去將軍參贊姑留世職仍統江南官兵戴罪圖

功見在吉安參贊大臣均不勝任其以都統勒貝護軍統領哈克山副都統布舒庫前往爲參贊大臣更選八旗護軍參領及各王府長史共八員一同遣往爲夸蘭大彼處所餘夸蘭大盡汰去又吉安礮手俱未諳練每翼選礮手二名發往軍前班迪等所訊軍狀姑俟事平再議○癸卯諭吏部戶部兵部自逆賊吳三桂煽亂以來各用兵地方文武官員或矢志固守勢窮莫支盡節封疆或身陷賊中堅貞不屈橫被慘害或從容就義全家殉難視死如歸此皆爲國捐軀克全忠節深爲可憫其有骸骨妻子俱准動正項錢糧資送歸里以昭朕優卹忠節至意○調吳達禮爲禮部尙書

由刑部調

○甲辰含譽星見又卿雲見○奉命大將軍康親王傑書將

福建不肯從逆之編修李光地與全道何可化將樂縣教官李重光及先被脅從後復來歸之汀州府知府孟熊臣等題請議敘得

旨李光地不肯從逆差人密奏地方機宜忠貞茂著深爲可嘉從優議敘何可化李重光孟熊臣亦著議敘尋授李光地爲額外侍講學士○乙巳先是 上諭據荊州坐塘筆帖式報賊犯遠安後旋復退回逆賊或因我兵進取長沙岳州虛聲牽制亦未可知大將軍順承郡王勒爾錦等應作進兵之勢揚言渡江以疑賊兵至是定遠平寇大將軍安親王岳樂等奏逆賊吳三桂糾聚賊眾死守長沙 上復令勒爾錦速勒兵臨江更令圖海整飭陝西滿漢官兵進扼漢中要路移檄聲言進兵以分賊勢偏機有可乘卽行進剿○丙午先是安遠靖寇大將軍貝勒尙善等奏二月二十六日遣兵千餘由岳州送馬三千餘匹赴長沙 上諭大兵需馬甚殷非尋常比貝勒尙善等去賊甚近必審知萬無一失方行遣送今長沙岳州之間路未甚通若逆賊阻截護兵力單難保無虞宜

豫約安親王遣兵相迎度兵且來然後發往且將軍鄂內率兵赴岳尙善所知或俟此兵到後多添兵力俾無他慮然後遣行今但以千兵護送如許馬匹殊爲輕忽儻事出意外於我不利且爲賊資則是尙善明誤征剿大事尙善其速偵送馬消息以聞至是尙善等報官兵解馬於本月初八日抵七星臺遇賊伏兵爲所邀奪上切責之曰尙善等統兵赴岳已歷三載糜餉老師未獲寸土今又將送往安親王軍前馬匹冒險遣發且以少兵護行致中途被奪反爲賊利貽誤大兵急需情罪匪輕宜卽從重處分念其見在征剿姑俟事平察議未幾岳樂以遣兵迎馬遲緩致中途被刦具奏引罪上亦切責之曰剿滅逆賊惟馬是賴貝勒尙善等豫約三月初二日馬到長洛河而岳樂故失期約不遣兵往迎目覩戰馬數千盡爲賊有大喪軍資情罪甚大事平之日從重議罪○

江西總督董衛國奏大兵圍困吉安已久賊將韓大任因糧匱勢蹙於本月二十一日夜出南門趨舟東竄我兵遂入城下部知之夏四月己酉撫遠大將軍都統大學士圖海奏招撫韓城等縣北山地方僞總兵喬斌等一百餘員下部議敘○庚戌先是江甯副都統綽可託出征廣東託言有病向平南王尙可喜具呈遂還江甯至是 上諭議政王大臣等我朝用兵以來凡出征大臣俱各奮力行間始終其事未有軍務未竣半途而返之理從前廣東多事之秋綽可託稱病還江甯顯屬規避著革職披甲發往將軍葬依圖軍前○以介山爲刑部尙書由左都御史遷○辛亥諭兵部吉安諸處兵爲數甚眾旣遣參贊大臣宜更擇賢能爲前鋒統領步軍總尉薩克察巴圖魯善哨探習戰陣可署前鋒統領赴吉安參贊軍務左翼遣前鋒護衛噶爾麻右翼遣前鋒參領馬錫泰同往○壬

子吏部議

天壇文華殿所用藍黃甍瓦因原任監督及審戶等

支領錢糧燒造年久尙未完工俱應按律問罪之人乃工部題請
仍令伊等催造及奉旨著伊等同奏又不將錯處引咎應將尙書

常鼎翼如錫降四級調用侍郎徐繼煒既已公同具題又奏稱本

欲兩議明係巧飾殊玷大臣之體應革職從之○癸丑轉伊桑阿

爲戶部左侍郎以察庫爲戶部右侍郎

由內閣學士遷

○甲寅于故原任

工部侍郎楊運昌祭葬○丁巳以喀代爲左都御史

由倉場侍郎遷

○戊

午鎮南將軍莽依圖奏入粵士卒無馬者眾

上命簡親王喇布

及總督董衛國撥江西滿漢官兵馬二千匹送莽依圖軍前自京

師發往長沙馬四千餘匹抵南昌日太僕寺卿溫代撥二千匹以

補江西馬額已而揚威大將軍簡親王喇布奏將軍莽依圖等於

本月二十四日已統兵赴粵天暑道遠送馬恐難驟至 上命喇

布等仍選江西官兵馬一千速送贛州付侍郎舒恕等轉送莽依圖軍前並切責喇布曰喇布明知進粵大兵所關甚要不卽遵旨遣送馬匹竟使兵丁徒步前進殊忝大將軍之職應卽議處以見在用兵俟事平旋師之日嚴加治罪○撫遠大將軍都統大學士公圖海奏臣今駐防秦州寶雞官兵進偏禮縣驛門諸處隨移檄聲言大兵分路進剿今親統重兵深入四川但恐時多淫雨輪輓艱難當俟機會酌量前進得旨今將軍穆占協剿長沙貝勒尙善與將軍鄂內水陸攻岳故逆賊吳三桂親赴長沙集諸路賊死守湖南我兵若乘此機會各路進剿則吳逆指日可滅計在陝官兵馬數甚多當此逆賊勢分之時若不進偏四川則坐糜糧餉殄賊無期大將軍公圖海其遵前旨速行進發○嚴自明遺書江西總督董衛國乞降董衛國以聞得旨今將軍喇哈達莽依圖等兵兩

路進粵賊自明若悔罪反正來迎王師當赦其罪仍前錄用簡親

王喇布其卽檄令知悉○己未以陳鼐永爲工部尙書由左都御史遷○

奉命大將軍康親王傑書奏處州府慶元縣民吳臣任等不肯從

賊招集民兵立寨自守伊等身係細民乃能抗賊守義在內應援

斬殺逆賊實爲可嘉已將吳臣任等交與浙江督撫願效力者酌

量錄用願歸農者酌量獎賞其陣亡札委守備吳受南等亦應交

與督撫酌量恩卹下部議行○辛酉 上幸霸州行圍○丙寅

上駐蹕南苑○以宋德宜爲左都御史由吏部左侍郎遷伊桑阿爲工部

尙書由戶部左侍郎遷田六善爲工部右侍郎由左副都御史遷孔郭岱爲內閣

學士由通政使遷○丁卯江西總督董衛國奏提督趙賴遣兵敗賊於

泰和縣擒僞參將蕭元等殺賊六千有奇又招撫僞總兵崔復等

一百十二員兵丁五千餘名下部議敘○戊辰贈浙江殉難溫處

道僉事陳丹赤永嘉縣知縣馬琿溫州副將楊春芳左都督遊擊魏萬侯守備熊天琳官廕○己巳 上還宮○庚午調郭四海爲倉場侍郎由督捕調○贈陝西死事遊擊李進忠守備完文元官廕○安遠靖寇大將軍貝勒尙善等奏逆賊吳三桂率眾往衡州得旨我兵攻圍長沙賊已窮蹙欲往衡州侵犯贛州吉安諸處以分我兵勢亦未可料其令簡親王喇布侍郎舒恕總督董衛國總兵官哲爾肯等分布防禦偵賊情形不時奏聞○辛未 上親撰大德景福頌書錦屏進 太皇太后○先是揚威大將軍簡親王喇布遣學士王啟元等奏復吉安情形 上諭喇布等統領重兵圍吉安一城日久不下虛糜國帑徒勞士馬被困之賊不能撲滅故使逸出逸賊率皆步行復不能追擊聽賊渠脫逃情罪重大宜卽處分念見在進兵俟事平旋師之日嚴加治罪又王啟元奏稱吉安

雖復而賊皆逃出與土寇合勢江西未爲全定前因總督董衛國奏稱吉安已復逸出之賊見在圍剿故令酌量分遣大兵赴袁州南昌今江西旣未全定可令參贊大臣到日相視地方輕重緩急如不能如前旨分遣則聽其便宜調度至螺子山拒賊一案與縱賊逸出官兵其嚴察罪狀以聞至是遣王啟元還吉安復令傳諭喇布及諸將等曰諸路大兵俱各殫力殺賊惟江西一路屢屢朕憂爾等圍困吉安旣已逾年乃縱賊盡令逸出又不恤人民肆行侵掠夫國賦出於民有一民斯有一民之賦若不撫輯招徠地方何由底定又屢稱江西兵士戰馬羸瘦多斃爾等頓兵江西未出四五百里外戰馬何由羸斃況康親王兵由浙江定福建入廣東彼馬何獨能進豈非爾等憚入楚粵豫爲託故乎嗣今宜竭力辦賊平定疆土勉建功績用贖前愆○奉命大將軍康親王傑書奏

甯海將軍喇哈達等自泉抵閩沿途招撫僞建威將軍一員大監
督二員總兵七員副總兵十三員參將以下把總以上共三百五
十六員兵丁四千一百七十名獲火礮器械無算下部議敘○甲
戌以劉捷爲左副都御史由大理寺卿遷○乙亥諭議政王大臣等西安

將軍佛尼勒出征四川保甯虧損官兵貽誤大事可罷其將軍革
去世職留所襲伊父拜他喇布勒哈番令署西安將軍事○轉陳
一炳爲吏部左侍郎調杜臻爲吏部右侍郎由禮部調

五月丙子朔以達哈他爲兵部督捕左侍郎由左副都御史遷○江西總

督董衛國奏招撫僞總兵蔡仕伯及兵五千餘名復崇仁縣得旨

嘉獎下部議敘○丁丑 上如鞏華城○戊寅 仁孝皇后忌辰

行三期致祭禮 上回宮○己卯諭大學士等帝王之學以明理

爲先格物致知必資講論向來日講惟講官敷陳講章於經史精

義未能研究印證朕心終有未慊前曾諭內閣諸臣或朕自講朱註或解說講章內閣諸臣奏稱朕宜隨便發明書旨不必豫定規程今思講學必互相闡發方能融會義理有裨身心以後日講或應朕躬自講朱註或解說講章仍令講官照常進講爾等會同翰林院掌院學士議奏尋大學士等議覆講官進講時 皇上隨意或先將四書朱註講解或先將通鑑等書講解俾得仰瞻 聖學講畢講官仍照常進講則理義愈加闡發而裨益宏多矣從之○壬午浙江總督李之芳奏僞揚烈將軍程鳳擁眾數萬占踞德興程鳳身故伊妻王玉貞僞稱掌揚烈將軍印務臣遣人開誠曉示王玉貞率僞總兵楊彪等三百四十八員家口四百七十三名兵三萬一千二百四十三名赴軍前投誠下部議敘○乙酉傅宏烈遺右理事官麻勒吉書稱目下廣東震動若得大兵速進南安傅

宏烈從中接應前赴韶州以扼廣東咽喉則兩廣可計日而定廣東路通則廣西全省傳宏烈便可一面當之但須加一虛銜方可行事並標下官員各照原銜換給印劄庶可鼓勵人心麻勒吉以聞得旨傳宏烈圖報國恩忠誠懋著可優升爲廣西巡撫今將軍莽依圖等大兵已進廣東俟傳宏烈迎見軍前卽與敕印其標下官員亦令大將軍簡親王給以印劄○丁亥揚威大將軍簡親王喇布奏四月二十九日將軍莽依圖率領官兵抵南安嚴自明以城降得旨嘉獎下部議敘○戊子以邵甘爲左副都御史由通政使遷○辛卯以張士甄爲禮部左侍郎原任○壬辰賜福建水師提督海澄公黃芳世蟒段朝服鞍馬弓矢令照在外藩王例一體遣人請安諭曰卿父子功烈素著復全家殉難每念及此朕心深爲傷悼況卿由粵東進剿忽遭廣省兵變孤身涉險而出可見忠貞不貳

顛沛不改其守今仍襲海澄公鎮守福建水師提督總兵官卿愈
加訓練鼓舞將士以靖海氛使地方秋毫無犯百姓安堵方爲不
負封疆重寄○癸巳講官喇沙里陳廷敬等進講孟子一暴十寒
章 上曰君子進則小人退小人進則君子退君子小人勢不並
立孟子所謂一暴十寒於進君子退小人親賢遠佞之道最爲明
快人君誠不可不知也○甲午諭大學士索額圖尙書明珠阿穆
瑚瑯內大臣奇塔特曰厄魯特鄂齊爾圖車臣汗與噶爾丹台吉
向俱進貢內自相殘噶爾丹台吉攻鄂齊爾圖車臣汗以陣獲弓
矢等物來獻若徑收納朕心不忍可止收其常貢之物以此旨傳
諭來使○辛丑諭兵部莽依圖旣授爲鎮南將軍平定廣東一切
機宜若由江西大將軍王及侍郎舒恕等轉達似屬非宜且耽延
時日嗣後凡軍機賊情地方形勢莽依圖其徑行奏報○以麻爾

圖爲陝西按察使

由郎中選

○江西巡撫佟國楨奏招撫逆賊張元仁

等兵一萬六千二百餘名下部議敘○癸卯諭講官等爾等進講

經書皆內聖外王修齊治平之道朕亦孜孜詳詢每講之時必專

意以聽但學問無窮不在徒言要惟當躬行實踐方有益於所學

爾等仍直言無隱以助朕好學進修之意○乙巳先是 上諭兵

部前安親王岳樂等奏請紅衣礮隨已發往今聞袁州到長沙道

險阻運礮夫役旣多爲費實繁若礮一到卽得長沙則解送固宜

儻難猝拔則送亦何益念安親王兵久入湖南馬多致斃已自京

撥馬陸續發往今將軍穆占率精兵會剿猶未克取長沙與賊對

壘如故我兵甚眾芻秣無多卽馬到長沙勢必坐致疲瘁不堪驅

策可令馬匹暫停袁州紅衣礮暫留南昌溫代先赴安親王岳樂

將軍穆占等軍前詳議以聞安親王所統軍士雖曾給賞爲時已

久應撥正項錢糧再行頒賜總督董衛國無論何項錢糧撥二十萬兩解赴袁州俟溫代自長沙回日酌量轉解至是溫代奏曰臣詢安親王岳樂將軍穆占等皆云紅衣礮卽到亦未必能遂破長沙芻秣誠少而軍士缺馬甚多應否解送請旨裁奪 上乃命留紅衣礮於南昌仍令溫代解銀馬赴安親王岳樂將軍穆占軍前○免南昌等三十三州縣去年水災賦

六月丁未以旱命大臣理刑獄○戊申尙之信奏臣聞將軍莽依圖兵抵韶州卽於五月初四日率省城文武官及兵民歸正復遣署都統尙之瑛等代臣赴韶迎接王師得旨尙之信著襲其父尙可喜平南親王爵○原任廣東廣西總督金光祖奏臣標舊兵依臣密約斬首叛副將雷孚言擒僞總督董重民等決意歸正得旨尙之信金光祖等將僞總督董重民及所執僞官品大者委官兵

護解來京○揚威大將軍簡親王喇布奏署副都統尼滿會同總督董衛國提督趙賴總兵官許貞進取樂安行至沙岡分兵七隊俱於花山會齊殺入大嶺隘口擊敗賊眾陣斬僞總兵參遊等官一百餘名殺賊五千餘人復樂安縣得旨嘉獎下部議敘○王子諭兵部據尙之信奏劉進忠以康親王招撫文檄潛送吳逆召兵自救足知劉進忠心懷詭譎非實意歸誠可檄康親王密爲之備○先是安遠靖寇大將軍貝勒尙善等奏得烏船四十艘即可破賊上命江甯巡撫慕天顏如數速造以資大兵之用尋慕天顏奏所造烏船甚多必須時日臣躬自督工期以六閱月告竣得旨岳州需船甚急若六閱月始竣則秋冬已過有誤破賊之期慕天顏其晝夜併力務於八月內竣工遣往岳州○癸丑禮部題前經九卿議准御史程文彞奏請本年添行鄉試今查隸江南浙江三

省貢監數多應各遣官考試河南山西山東陝西貢監數少應令在河南省遣官一同考試湖廣江西歸併江南省福建歸併浙江省考試以入場應試人數計算於十五名中取中舉人一名不必另取副榜於本年九月內考試從之○乙卯揚威大將軍簡親王喇布奏署副都統尼滿提督趙賴總兵官許貞等招撫偽將軍楊玉太及所部偽總兵徐虎等四十九名下部議敘○浙江提督常進功奏海賊踞舟山造船臣率官兵自黃巖赴定海駕船出關於螺頭門捉齒洋擊沈賊船一十三隻獲船八隻生擒偽副將一名復令官兵搜勦連破木城木寨殺賊二千一百六十五名燒毀所造船隻無算得旨嘉獎下部議敘○丙辰諭議政王大臣等侍郎覺羅舒恕既駐贛州統轄滿漢兵防守地方不可無印副都統楊鳳翔所留安南將軍印見在平寇將軍華善所其令華善遣員齎

印速赴江西付總督董衛國轉給舒恕○尙之信奏臣父平南王
尙可喜於去年二月兵變之後投繯自盡被左右救甦後憂鬱疾
篤於康熙十五年十月二十九日薨逝得旨平南親王尙可喜久
鎮巖疆勞績素著自聞兵變憂鬱成疾始終未改臣節遂至殞逝
可憫應得恩卹著察例議奏○初尙之信奏僞巡撫馮甦不忘國
恩協謀歸正遂投馮甦爲廣東巡撫已而傅宏烈奏馮甦爲逆賊
吳三桂顧待甚厚且其家屬俱在雲南今茲投誠乃出於窮迫請
安插內地以絕其暗通聲息 上授馮甦爲刑部侍郎令其來京
候補○丁巳尙之信奏原任高雷總兵官祖澤清率所屬官兵投
誠高雷廉三郡悉定下部知之○江西總督董衛國奏據在省官
員報湖廣平江及銅鼓營逆賊聲音出犯甚急臣已留提督趙賴
兵守樂安而身還省城遣兵赴勦適簡親王喇布復調臣標兵前

往樂安臣卽啟覆簡親王簡親王遂責臣以輕王慢旨旣奉嚴諭何敢有誤隨撤進勦銅鼓營兵發往樂安但省城乃楚粵後路最屬緊要留省滿兵止餘二百又無綠旗官兵萬一有警恐難禦遏致負皇上任使乞賜罷斥另簡賢能以副總督重寄上乃切責喇布曰前屢詔喇布進勦吉安屢以省會重地不便輕離爲辭今身赴吉安省會何遂不緊要耶省城官兵盡調遠地輕率已甚且以輕王慢旨之語恐嚇調兵尤屬不合喇布等其速撤可緩地方官兵鎮守省城務使無虞嗣後調發綠旗官兵皆與總督董衛國會商行之董衛國亦照舊供職○己未諭平南王尙之信齎奏參將羅思漢曰爾王素懷忠盡思報效國家朕已知之舉廣東全省歸誠民免湯火之患深爲可嘉據今時勢勦滅吳三桂甚爲緊要大兵進取務貴神速吳逆近在湘潭其意蓋以大兵必從衡永

廣東進攻故據此爲備今廣西若能反正爾王卽宜率兵三路進
勦滿洲大兵亦令各路遄發前此吳三桂率領僞將軍十八人賊
兵十萬屯聚長沙挑濠立椿僅可支持旦夕若大兵數路並進吳
逆斷無如許僞將賊兵隨處備設濠椿以與大兵相抗其滅亡可
翹足而待矣爾到彼卽傳朕諭○命翰林院侍講學士顧八代赴
莽依圖軍前傳諭莽依圖曰用兵利在神速毋稽遲貽誤或不得
已擇便而行者有之凡此機宜爾自熟悉近以逗留誤事如長沙
荊州諸處其明驗也○尙之信奏提督嚴自明係吳逆舊屬不知
軍旅今粵東初復兵心甫定若以控馭無術形迹可疑之人復令
統轄恐兵心不安 上諭兵部曰據尙之信來奏宜撤嚴自明還
京師但撤還嚴自明恐將來投誠者皆懷疑不前其優加嚴自明
爲將軍調赴廣州閒住已而嚴自明奏臣旣挂彈章宜避嫌疑乞

賜撤還或安置畿輔或隨侍輦轂 上乃命嚴自明俟新提督到

日卽還京師○庚申轉察庫爲戶部左侍郎以薩穆哈爲戶部右

侍郎

由內閣學士遷

○辛酉諭各省王貝勒大將軍將軍總督巡撫提督

等逆賊吳三桂背恩倡亂散布僞劄誘惑兵民迫脅官吏以致生
民塗炭所在騷然今各路大兵勦撫並行平涼福建廣東等處相
繼平定文武大小官員兵民人等俱被恩賞安插得所惟湖南四
川雲南貴州官員兵民人等仍陷賊中未得歸正念此等俱受國
恩必非甘心從賊蓋有懷忠義之心而無脫身之路者又有身被
迫脅懼罪疑畏者今大兵雲集不日蕩平賊寇玉石難分朕心深
爲不忍今特頒敕諭概示招徠凡在賊中文武官員兵民人等悔
罪歸正前事悉赦不問仍照常加恩或有擒殺賊首投獻軍前及
以城池兵馬來歸者仍論功優敘爾等卽宣布曉諭以副朕寬仁

矜全之意○免陝西用兵州縣歷年租賦○己巳追贈海澄公太子太保黃梧太保諡忠恪加祭一次○庚午諭奉命大將軍康親王傑書據筆帖式塔穆哈圖報潮州劉進忠已於本月初六日投誠今劉進忠復遺書吳三桂爲平南王尙之信舉發是劉進忠投誠本非真心不過勢窮就撫耳又總兵官劉炎所遺吳三桂書亦皆搜獲其心迹與劉進忠略同此等皆心懷反側久留潮州必致生變若果已投誠康親王等卽託言欲與相見以計撤回留駐福州設或遲疑不至速行奏聞劉進忠等旣撤則令將軍喇哈達以兵之半守漳泉都統賴塔率其半守潮州仍令尙之信遣原任潮州總兵官王國棟盡率其標兵詣賴塔處協守○辛未以溫代爲內閣學士

由太僕寺卿遷

○予故平南王尙可喜祭葬立碑諡曰敬